

1 Samwel

Ana bo jele Samuel

¹ Nne awohng jolo go Ramatayim, nnea Jufiti, á lohng go ejahbe ewong ji Efriim, mbing enye bo jo lung-e re Elkana, mmona Jeroham mmon no Elihu, ji mmona Tohu, mmona Jufi, nnea Efriim.

² Á bele akal abal, awohng bo jo lung-e re Hanna, noko Penina. Penina bele abon, Hanna belem.

³ Go elya anehng anehng nnenlum noa jo lohng ege ejahbe song kak Esowo, fere song lim njom ka Jehova ji Kp'fili Elbung a Ndi go Sayilo, go edi ji Hofini a Finihas, abon abal ba Eli jolo abalimajom ba Jehova.

⁴ Ngare anyehng anyehng nyi efung l'rehng bi Elkana bahke limi njom, á bahke kimi nnyam a jom ka Penina, a abon ebe ba nkal, a ba nlum.

⁵ Wo goji Hanna á jo ka-e b'budu, tibre á jo kor-e sehng, wo Jehova b'bulu ej'jele eje.

⁶ Tib eji Jehova bulu ej'jele Hanna, nfahb we jo lim-e eji á l'jo rak atahng.

⁷ Jia jo jolo elya elya. Ngare anyehng anyehng nyi Hanna l'je go etahk Jehova, nfahb we, bahk-e limi á jo ling, jol nsol alehke a nehm taame li.

⁸ Elkana nlum ewe bahke bungu tong-e re, <<Hanna jenji wahngka a kp'lingi? Jenji wahngka a kil lehke nsol? Jenji wahnge eltim ena li go ndon? Anv, n wa-a nehme gbal sehng abon ba nlum na awuba?>>

⁹ Efung abehng eji bo li nsol mal, fere w'wo go Sayilo, Hanna soro tahm yiimi. Ngare nyia Eli ji nlimanjom ji go egbiri go nkpea mbutahk etahk Jehova.

¹⁰ Go ege eyam eltim, Hanna kake ero ka Jehova, fere jo sahb l'ling.

¹¹ Owo á kehm koko nwongo re, <<Jehova ji Kp'fili Elbung a Ndi , li re a bahke lub seenge nyehn nlokeltum ewa no ki kpi eyebatahng fere buum-m k'yini nlokeltum ewa, lub ka-e mmon no nlum, m bahk-e rodo ka Jehova go afung kpee nya á bahke jolo go elkpin, jol elsen bo we-e nehmm kooro go ege esi.

¹² Eji á soro asi jo kak ero ka Jehova, Eli jo baab-e go kpakebibi nnyo.

¹³ Hanna jo kake ero go ege eltim, akpakebibi nnyo enye nya jo jehbe, jol ellum bo joom wuk, Eli tiri re á kpi amahm buumu,

¹⁴ á kehm bungu tong-e re, <<Bahke labe renan re wo sa go amahm abuumu ema maa? Rahke amahm maa.>>

¹⁵ Hanna kehm faange re, <<Ano sang nsoo, me nnenkal no eltim kp-m sahb gb'gbiingi wo. Amahm sang m ma wo, afi amahm ma kpo lim nne jo buumu, me n fanngel eltim ename ka Jehova.

¹⁶ Ka ko nlokeltum ewa ana ebi nnenkal, n kpi ero kak a, tib go egburu eyameltim a ndon.

¹⁷ Eli kehm faange re, <<Song go elkoono, nong Esowo bi Isreel lim ka-a ana a bahb-e no.>>

¹⁸ Hanna kehm bungu re, <<Nong nlokeltum ewa lub li efa go ega esamahr. Owo Hanna kehm

tahme eje song li ejum alehke, á joom kpe guunu go ege esamahr.

¹⁹ Njahm efungfu bo kehm mehle song kak Jehova, kehm feere ebo kehngé go Rama. Elkana kehm noongo a Hanna nkal ewe, Jehova buumu Hanna.

²⁰ Eji ma kang abon afung Hanna kehm sake ela jel mmon no nlum, gung-e mbing re Samuel, fere bung re, <<Tibre ye wo m bahb-e Jehova.>>

Hanna rodo Samuel kak Esowo go Ebo

²¹ Eji Ekana nlum ewe, kpe tahm a nnahb enye kpee re á song lim njom nyi elya ka Jehova, fere lim ana á ko nwongo,

²² Hanna jeem. Á bungu tong nlum ewe re, <<Ngare nyi mmon noa l'kimi abel, m bahk-e rodo song yake ka Jehova, á bahke lene o go elkpín ene kpee.

²³ Elkana nlum ewe kehm-e tongo re, <<Lim ana fuum-a no.>>Jol a tete wo kim-e abel, nong ellum Jehova lub jol nob nob. Ano wo nnenkal noo sa no etahk yabe mmon noo, tete á kim-e abel.

²⁴ Eji á me-e kimi abel, á kehm rodo mmon no nlum noo, ana á se se o tahm a ne, a mmonanfong no ma kang nnya era, go ebohke ebam abe, a eyahbe amahm, ko mmon noa tahm a ne go etahk Jehova go Sayilo.

²⁵ Eji bo ko mmona nfong ba wul lim njom, bo kehm koko mmon noo song ka Eli.

²⁶ Hanna kehm-e tongo re, <<Nsóo, nyehne! A kp-m kpeka buuma? me wo li nnenkal no yiimi

a kohl-a nnya nyi ma sehng go, jo kak ero ka Jehova.

²⁷ N jo kake ero bahb Jehova re á kam mmon noa, wo anv Jehova ma-m faange ji n bahb-e no.

²⁸ Anv, n kp-e yake ka Jehova. Go afung kpee nya á bahke jolo go elkpín,>> owo mmon no sa no jo loko Jehova, á kehm gongo kake Jehova edi jio.

2

Ero bi Hanna kake no

¹ Owo Hanna kehm kake ero re, <<Eltim ename kp'geere goji Jehova, Jehova eblim me mbel ekpunu. M kp'woro nnyo goji anebekv ebame, tibre ma-m sahb y'yebe sehng goji a ma-m yehke yake .

² Nnene limm no li saang ana wo Jehova, nnene limm no sehng wo, ekpartal limm ji li ana Esowo ebahre.

³ Kana sa ji o jo bung elgeere elgeere, afi taame nnyo ema jo bung agabbe, tibre Jehova ye wo li Esowo bi kp'kahne nsol kpee, sehng go ege, ye kpo feede ejum ajehng ajehng nne awohng wohng.

⁴ Mban nyi atakuru ebbanne, wo egom ji ma seele gbo, ebfere bel eko.

⁵ Ane ba bele nsol gbalee nyi ellehke, mehle tahm eltum asebe ka elbo eji bo l'bel nsol alehke li, wo ane ba jo wa njal, njal kpeem jo yam bo. Wo nnenkal no jolo ngum, ebjel abon asehma, wo ye ji bele abon ba nlum gbalee, yebfere kpuk sa abo abo,

⁶ Jehova wo kpo ko elkv ba, fere tob ka elkpín, ye wo kpo kak go elahm, kpe fere nyahme.

⁷ Jehova wo kpo tum ekpak, a afang, ye wo kpo rede, fere mehl wahre.

⁸ Ye wo kpo mehl akpak go ebtohko, fere yehke go ebimatong ane ba li elehng nsol, á kpo fere jehke bo go ellong atubesi, fere lim bo, bo li elkv eti etul ji ekpunu. Tibre Jehova wo kpi abangennahb ekahme nya njini, ona wo á kunu njini nyia.

⁹ Á bahke baabe akpade eljen nya akakesehk alokeltum ebe, wo aneb ab'bi bahke belle go edi ejanng, tibre go eko sang nne kpo nok bel;

¹⁰ Jehova bake ranng ane kpee ba kpo yiimi nfaabe a ne, Á bahke take ndan go elbung ranng bo. Jehova bahke lame njini nyia kpee tete rehng go ekahlsi. <<Á bahke kake ntul ewe eko, f'fo esehng ehta li ka ntul ewe no á me-e kak akehng go esi.>>

¹¹ Owo Elkana kehm tahme kehng go Rama, wo Samwel mmon noo sa jo loko Jehova go elwo ni Eli ji jolo nlimanjom.

Abi abon ba Eli

¹² Abone Eli jo limi ab'bi; jol Jehova joom lub bo.

¹³ Eljini ellimi ni abalimajom jolo re, ngare nyi nne awohng awohng l'ba lim njom, nlokeltum no nlimanjom bahke fili egbehm ji kpi ntake era go ege ebo eji bo kpi nname nname nnyam go agun,

¹⁴ á l'jahm egbehm jio kak go ekpaseenge, afi ekpangeny, afi ejongobil, afi etu, nnyam anyehng anyehng nyi á l'tung yehke, bahke jolo ka ye nlimajom. Ano wo bo jo lim anebe Isreel kpee ba jo ba go Sayilo re bo ba lim njom.

¹⁵ Jol eji bo kala fi afom, nlokeltum no nlimanjom bahke bake ba tong nne no kpi njom lim re, <<Ka nlimanjom nnyam á wo go agun, á nehm taame ko nnyam nyi bo ma lam go ega abo. Sehngem nnyam nyi li mbir mbir nyi á bahke koko.>>

¹⁶ Nne noo l'fere tong-e re, <<Nong nne gbo mbang jahm afom fi, wo yehke nya kor-a no, nlokeltum noo bahke faange re, E'ee, yake kpee ka-m, a tohko yake, m bahke koko go egban.

¹⁷ Abiafem nya abon Eli baa baa gbale sehng go ejang bi Jehova, tibre bo jo fili ayare nya Jehova, ekpunu bo joom kak.

¹⁸ Ngare nyio, Samwel jolo go Silo jo loko Jehova. Á jolo mmon no nse, fvfo á ajo kake monkphehrekahbe ewobo no nlimajom.

¹⁹ Elya anehng anehng nnyehn jo kono eljahme mmokpawobo no nse, fere ko song ka-e, á l'jee a nlum ewe re bo song lim njom elya.

²⁰ Ngare anyehng anyehng nyi bo je, Eli jo fuulu Elkana a nkal ewe, fere bung re, <<Nong Jehova ka-a abon sehng goji nnenkal noa, eji bo l'ko nji nyi mmon no á kake ero bade, fere rod-e ka Jehova.>> Owo bo kehm feere kehng.

²¹ Jehova limi nnoobo ka Hanna, á jele abon ba nlum ara, jel ba nkal abal. Gana fvfo Samuel soro asi jo gbale go esamahr bi Jehova.

²² Anv Eli, ye ji ma sahb k'kul wuku bade nsol nyi abon ebe kp'limi anebe Isreel kpee, ana bo kpo noongo a anebkal ba jo loko go mbuga mi li rehng go Ebkpatahk Elwane.

²³ Ano wo á bungu a bo re, <<Jenji wahnge n kp'limi elkohn nsol ana nyia? Me n wuk go ji ane kpee bade ab'bi nsol nya n kp'limi.

²⁴ E'ee, abon ebame, nsol nyi n kp'wuku ebyeere na yeere go ellong ane ba Jehova, nehme nob ano.

²⁵ Nne awohng l'lim abiafem tob nne noko. Esowo bahke ma gbo siki ka nne no ma soodo, wo l'fere jol re nne awohng awohng eblim abiafem tob Jehova, nne awoo bahke gboongo ka bo? Jol abon bao wuungem atung go enyam bio bi nde ebo, tibre jolo ntir nyi Jehova re á wul bo.

²⁶ Mmon noa re Samuel jo soro na asi jo gbal agbal nya ngubjing, á jolo nob nob go ejang bi Jehova, a ejang bi ane.

Enyehnamahr ji jolo bade etahk Eli

²⁷ Owo nnyehn amare Esowo kehm bake goji Eli ba tong-e re, <<Ji ji a ji Jehova ma bung: <Anv me, n tikem lennge elname ka ebangennahb babnso ewahne, eji bo jolo aju go ji ntula Ijiba?

²⁸ N yehke nso ewahne go at'tohngo nya Isreel kpee re á jol nlimanjom ewame, re á jo je go egudu njom, song jahm insen fi, fere jo kak nkpehrekabe ewobo ji nlimanjom go egame elbohngo. N fere tob ka ebangennahb babnso, ayare nsol alehke kpee nyi anebe Isreel ko ba lim njom.

²⁹ Jenji wahnge n kp'nyoko njom enyame a ayare nya n tibi re jol ka edi ellene ejame? Jenji wahnge á kp'kpunu abon eba sehng me, eji n kp'rodo atingi afv nnyam, nya ayare anyehng

anyehng nya Isreel ane ebame kp'kake, ń jo li fere jo j'jok?

³⁰ Fvfo, me Jehova, ji li Esowo bi Isreel ebbung rea, <N nyame re, ane go ega ebangennahb bahke jo lok-m ano ano.> Wo anv, Jehova eblenng re: <Ndan gbaa aname! Ane ba l'kpun-m, bo ba m bahke tob kpunu bo, wo ane ba l'nye-m bo ba m bahke nye bo.

³¹ Ngare kp'bake nyi m bahke rede afung elkpin ena, a afung elkpin nya anabe etahk babnso, eji nne awohng awohng ewahne l'k'kpe jo kul,

³² a bahke nyehne ejahk jahk go egame edi ellene. Jolo jolo kan re bo bahke limi nnoobo ka anebe Isreel, nnene nehm kpe jol go ega et'tohngo, no bahke jo kul.

³³ Nne awohng awohng ewahne no n tohk-e ten re á k'kpe loko go egame egudu njom, m bahk-e yake, ranng amahr enye, fere rede eko eje, et'tohngo eja kpee bahke jo kpo go enyod.

³⁴ <<Ji bahke limi Hofini a Finihas, abon abal eba bahke jolo elliingi ka-a re ji m bungu no bake loko jol go etingitingi, bo bahke kpoko efung efung abehng.

³⁵ M bahke yehke nkakesehk nlimanjom nondiki ka elname no bahke jo lim ana ji wob-m ga eltim, a ntir enyame. M bahke sahb l'lim nlaaga enye nyange, bo bahke jo loko go elwo ni nne no m me-e kak akehng go esi ngare anyehng anyehng.

³⁶ Owo nne awohng awohng no bake sake go ega ebangennahb bahke jo ba gong ndi gboongo ebahk asilva a ebgbu re, <<Titi lub kak-m eltum

edi njom alimi eji n bel nsol alehke jo li.>>

3

Jehova Lungu Samuel

¹ Mmon noa Samuel jo limi eltum esamahr Jehova go elwo ni Eli. Go afung nyao alum nya Jehova jo r'riidi, elfoongo nlem gbalee gaam kpe jol.

² Atv amehng Eli, ye ji amahr ma kehme elbamme, á kil kpe ga nyehn, á noongo go ege edi ji á jo kono elnoongo.

³ Enyaale ji Esowo ka si l'lahme, wo Samuel noongo go etahk Jehova, edi ji elkohl atahm ni Esowo jolo no.

⁴ Owo Jehova kehm lungu Samuel. Samuel kehm faange re, <<Nyehn me ga.>>

⁵ Á kehm beke je goji Eli, fere tong-e re, <<Nyehn me ga; ji a lung-m no.>> Wo Eli kehm bungu re, <<Me wa-a n ka lung; feere song noongo go ndi.>> Á lohko feere song noongo.

⁶ Wo Jehova kehm kpe lung, <<Samuel!>> Samuel kehm mehle tahm goji Eli, kehm bungu re, <<Nyehn me ga, ji a lung-m no.>> Eli kehm bungu re, <<Mmon ewame, n wa-a n ka lung; feere song, wo song noongo ndi.>>

⁷ Ngare nyia Samuel ka kahn Jehova: Jehova ka lennge ellum ene ka-e.

⁸ Go nkpel era Jehova kehm kpe lung Samuel! Owo Samuel kehm mehle tahm goji Eli, kehm bungu re, <<Nyehn me ga; ji a lung-m no. Owo Eli ba seb kahn re Jehova wo kp'lungu mmon noo.

⁹ Owo Eli kehm tongo Samuel re, <<Song noongo, á l'kpe-a lung faange re, 'Bung Jehova, nlokeltum ewa kp'wuungu atung.' >> Ano wo Samuel kehm feere song noongo go ege edilnong.

¹⁰ Jehova kehm bake ba yiimi o edi jio, ba kehme ellungu ana á jo kono ellung ngare nyehko, <<Samuel! Samuel!>> Owo Samuel kehm faange re, <<Bung, nlokeltum ewa kp'wuungu atung.>>

¹¹ Owo Jehova kehm tongo Samuel re, <<Nyehne, n yahke ba ellimi ejum go Isreel ji bahke limi nne awohng awohng no l'wuk bade, bahke nehke.

¹² Go ngare nyio, ejum ajehng ajehng ji m bungu bade Eli a ebangennahb je, m bahke lohngo a nya, bomo go mbomannahb tete ba rehng go ekahlsi.

¹³ Tibre n tong-e re m bahke lame ebahngnahb enje nkahlkahl, tib go abiafem nya á kp'kahne bade, abon ebe jo su Esowo, á maam tiki sahde bo.

¹⁴ Fvfo, me n tir bade etahk Eli, <Ebi ji etahk Eli elgboongo nehm jol go njom alimi, afi go ayare.>>

¹⁵ Samuel noongo eje o tete efungfu se, owo á kehm lennge abu etahk Jehova. Á jo f'fahl eltongo Eli elfoongo nlem nyio.

¹⁶ Wo Eli kehm-e lungu tong-e re, <<Samuel, mmon ewame.>> Samuel kehm faange re, <<Nyehn me ga.>>

¹⁷ Eli kehm-e bahbe re, <<Ejum aji o ji Jehova bungu tong-a no?>> Kam-a behr ejum ajehng ajehng ji á tong-a no, nong Esowo lim-a ebi ji sahb

gb'gbal, á l'fere behr-m ejum ajehng ajehng ji á tong-a no.

¹⁸ Owo Samuel kehm-e tongo ejum ajehng ajehng, á we-e behrem ejum ajehng ajehng. Owo Eli kehm bungu re, <<Ye wo li Jehova, nong á lim ji fuumu go ege esamahr.>>

¹⁹ Jehova jolo a Samuel eji á jo gbal asongo, Jehova tikem taame re ellum anehng anehng ni Samwel bungu no sehng nkpe.

²⁰ Anebe Isreel kpee, bomo go Dan tete rehng go Beeseba liingi re Samuel ebjol nnyehnamahr no Jehova.

²¹ Jehova soro asi jo tib elne go Silo, o edi jio wo, á lennge elne ka Samuel sehng go ege ellum.

4

¹ Wo Samuel bungu alum nyaa kpee tong anebe Isreel. Anebe Isreel lohngo re bo song nok a anebe Filista.

Anebe Filista Taare Elkohl Atahm

Anebe Isreel si ebehre ebo go Ebenejer, wo anebe Filista tob si abehre ebo go Afek.

² Anebe Filista kehm yehke nsoja ebo re bo song nok a anebe Isreel. Eji ebta nyange no, Filista nok ga anebe Isreel, fere wul bo ejum ane atahltahl atahlawubu go emahng ebta.

³ Eji nsoja feere kehng go ebo ebehre, anebkul ba Isreel kehm bahbe re, <<Jenji wahng Jehova ma yake anabe Filista re bo ga-r go ebta lela, wahr anebe Isereel? Nong wahr song koon elkohl atahm ni egbanngalung ji Jehova go Silo, eji á bahke ma jo jen anahre tahr-r yehke go ebo bi anebekv ebahre.>>

⁴ Owo bo kehm tumu ane tv go Silo, bo kehm song ko elkohl atahm ni egbanngalung ji Jehova ji Kp'fili Elbung a Ndi feere a ni, ye ji jehk go eti etul, go elka elka ni Aserubim. Abon abal ba Eli, Hofni a Finehas bo jolo o a elkohl atahm ni egbanngalung ji Esowo.

⁵ Eji elkohl atahm ni Jehova ba no go abehre, anebe Isreel kpee mehle song kehme elwahle g'gingi, ndi gb'gbekhe.

⁶ Eji anebe Filista wuku ejooko jio, bo kehm bahbe re, <<Elkohn ewahl ajii go abehre nya anebe Hibru?

Eji bo sebe kahn re elkohl atahm Jehova ni bo ma ko ba a ni go abehre,

⁷ anebe Filista kehm kehme elfahle. Bo bungu re, <<esowo ebba go abehre. E li go ntong! <<Euu anare!>> Ejum ana jia ka l'lim.

⁸ Wahr ebdemmao! Nne awoo bahk-r tahre yehke go ebo bi atahntahn asowo nyao? Bo ba li asowo, bo ji tumu ajoobo ayam nya wulu anebe Ijib go elka emahng.

⁹ Belen atahne ana aneblem wahn Filista! Tohko jol ano, m bahke woomo anebe Hibru go elwo ana bo ma-n tohko woomo. Belen atahne ana aneblum, wahn nok!>>

¹⁰ Ano wo anebe Filista noko no ga anebe Isreel, anebe Isreel be yel go ebo ebehre. Elwulu ni bo wulu bo gbale sehng. Isreel tane nsoja nyi jo jen akpade efung bio, ane atahltahl nkpe atahlara a nkpel elku.

¹¹ Elkohl atahm Esowo bo taare, abon abal ba Eli, Hofni a Finehas bo t'tob wul bo.

Elkv ni Eli

¹² Efung b'nehm o, nne no lohng go et'tohngo ji Benjamin, be go emahng ebta tahm go Silo, nsol me-e yare go ngubjing, a ebtoho go ege esi.

¹³ Eji á ba rehng, Eli ji go ege egbiri go nkpe a mbang jo baabe, tibre elfahle gbal-e go eltim bade elkohl atahm Esowo. Eji nnenlum noo ba yel ejahbe, ba tooro ji ma jol, ane kpee go nfram nyio kehm kehme aling ling.

¹⁴ Eli kehm wuku ewahl aling jio kehm bahbe re, <<Ewahl aling nyao lohngo rejen?

Nne noo kehm foomo song tong Eli ejum ji ma lim,

¹⁵ ngare nyia Eli ekang nnya atahl ani a nnya elku a nnya era, ye ji amahr enye ma kehme elbamme, á kil ga kpe nyehn.

¹⁶ Á tongo Eli re, <<me nne no lohngo go emahng ebta abake wo; m be na efungfu bia.

<<Eli kehm bahbe re, <<Mmon ewame, jenni ma jol go?>>

¹⁷ Nne no ko etib bio ba a bi kehm faange re,<<Isreel ebbe anebe Filista. Anebe Filista ebwul nsoja nyi Isereel gbalee. Fvfo abon abal eba Hofni a Finehas bobkpo, elkohl atahm Esowo bob taare fi a ni.

¹⁸ Eji á gahme elkohl atahm Esowo, Eli kehm tuulu gbo nkpiidankpa go egbiri ji á ji no go nkpe ega, emel eje bahne, á kpo, tibre á jolo nnenkul, gana yeclub. Á fili Isreel go nnya atahl abal.

¹⁹ Nkala mmon ewe, nkal no Finehas jolo ela, ebrehng ngare nyi á yahke jel. Eji á wuku etib bio re elkohl atahm Esowo bob taare fi a ni, fere tob wuk re nde nlum a nlum ewe bob kpo, á soro

tahm song kehme ejel rahng soro jel, eko tan-e tan go ejel bio.

²⁰ Eji á kehme elkpoko, anebkal ba bob-e eje bungu re, <<Ka yini ekpu, wob jel mmon no nlum. Jol á faangem, afi wuungu atung.

²¹ Á gung-e mbing re Ikabod, tibre á bungu re, <<Ellub ni Esowo eblohng go Isreel.>> Á bungu jia tibre bob taare elkohl aatahm ni Esowo, fvfo nde nlum a nlum ewe bob.

²² Á bung re, <<Ellub ni Esowo eblohng go Isreel, tibre elkohl atahm Esowo bob taare fi a ni.>>

5

Elkohl Atahm go Asdod a Ekron

¹ Eji anebe Filista ma taare elkohl atahm Esowo, bo rodo go Ebenejer song bum go Asdod.

² Owo bo kehm rodo Elkohl nio song kak go etahk elom Dagon, song bum kohlo Dagon.

³ Eji ane ba Asdod lohngo no njahm efungfu, bo nyehne re elokelom Dagon ebgo kohk esamahr go ndi go esamahr elkohl atahm ni Jehova. Bo song rod Dagon feere a ji jehke edi ji wuku wuku.

⁴ Wo efungfu behko re bo ba lohng je me, Dagon ebgo kohk esamahr go ndi, go esamahr elkohl atahm ni Jehova! Esi eje a abo ebbakke kpee noongo go egudu mbu, sehngem ekehre-nkv ji ji sa.

⁵ Owo wahnge tete rehng lela, jol afi nlimanjom no Dagon wo, afi nne nondiki wo no l'yel etahk elom Dagon go Asdod á nehm kpehme kaade akpade go egudu mbu.

⁶ Ebo bi Jehova sabe sehng a anebe Asdod, go adi nya jolo sennge o kak, Jehova koo elranng ba ka bo go mbang nyi ab'bi afahl ba tuubu bo.

⁷ Eji anebe Asdod nyehne ji kp'limi, bo kehm bungu re, <<Elkohl atahm ni Esowo bi anebe Isreel nehm kpe jol egahre, tibre ebo ebe ebbib anahre sehng a Dagon ji li esowo ebahre.>>

⁸ Owo bo kehm lungu atubesi Filista kpee ba kono, kehm bahbe bo re, <<E bahke limi renan a elkohl atahm ni Esowo bi anebe Isreel?

Bo kehm faange re, <<Nong wahr roden elkohl atahm ni Esowo bi Isreel song bum go Gati. Owo bo kehm rodo elkohl atahm ni Esowo bi Isreel song bum o.

⁹ Wo ana bo rodo no tahm a ni go Gati, ebo bi Jehova sabe sehng a ejahbe jio, ab'bi afahl kehm gboko tub bo, a elfahle. Jehova kake ejahbe jio erem gbalee, ajangkun a anebkul anebkul, Esowo tumu ab'bi afahl tv bo.

¹⁰ Owo bo kehm tumu elkohl atahm Esowo tv go Ekron.

Ana elkohl atahm jo yel go Ekron, anebe Ekron kehm kehme elrabe re, <<Bob ko elkohl atahm Esowo ni Isreel ba bum-r, re ba wul-r, a ane ebahre.

¹¹ Bo kehm lungu atubesi ba Filista ba kono edi ajehng, kehm bungu re, <<Tumen elkohl atahm Esowo ni Isreel tv go, nong feere song go edi ji jolo no, tohko jol ano bahk-r wulu a ane ebahre kpee.>> Tibre elkv ebko elfahle ba go ejahbe; ngare nyio Esowo ebkehme bo erem kak gbalee.

¹² Ane ba ki kpo, gbo ab'bi afahl, wahnge aling ebo rehng go ero elbung.

6

Elkohl Atahm feere Go Isreel

¹ Eji elkohl atahm Jehova ma jol go ejahbe anebe Filista nnyahng esehma,

² anebe Filista lungu nlimajom a anebe abuku nbu, kehm tongo bo re, <<Anv, e bahke limi rejen a elkohl atahm ni Jehova? Tong-r ana e bahke feere a ni go ege edi.>>

³ Bo kehm faange re, <<Ŋ l'feere elkohl atahm ni Esowo bi anebe Isreel, kana feere tum tv-e ki-e tob ka nsol njom, mbang anyehng anyehng tumen nsol njom aka nyi ŋ ma li ebi tv-e. Owo ŋ bahke nobo ayam enyahne, ŋ bahke tob kahn ji wahnge á kpeh-n kpaka kak erem.>>

⁴ Anebe Filista kehm bahbe re, <<Elkohn nsol njom aka a nyaa, nya e bahke tumu tv-e? Bo kehm faange re, << Ebahk agul eblon, emongo agul eblon nya bo limi go elfoongo afahl, toono ana nfange atubesi Filista li no, tibre elkohn ayam nya nehm nya gbo tub-n, wahn, a atubesi ebahne.

⁵ Tahl nsol go elfoongo ni akp'kpudu, a enyamatv bi kp'ranng ejahbe, wo ko ka Esowo bi anebe Isreel ellub. Fundiki á bahk-n yake abo, tob yake asowo enyahne a ndi enyahne.

⁶ Jenji wahnge ŋ kp'tahne ntim enyahne ana anebe Ijib limi no a Fero? Ngare nyi Esowo bi anebe Isreel bibi a bo, anv, bo tongem anebe Isreel re bo lohng, song mbang nyi boa?

⁷ Anv a, tooben mmvtv akpakenti nyi nfenfe bum, a edamagbudu ebbal, bo ji kpi abon, nong jol bo ji kala s'sol nsol, kanne adamagbudu nyao

go mmvtv akpakenti, fvfo roden abon ebo wahn kak bo go ega.

⁸ Roden elkohl atahm Jehova wahn kak go mmvtv akpakenti, kaken nsol njom aka nya n yake tum go elkohl, fvfo kaken elkohl nio go nkpe. Nong adamagbudu sol song ntahng tahng,

⁹ soro asi jo baabe. L'fere je go ege abuntahk, asongo go Beti Semes, eblohng re Jehova wo ma ko egburu ayam nya ba ka-r. Fvfo tohko fere jol ano, owo e bahke kahne re ebo ebe sang ma-r kim ndab, lohngo re jia ma-r tob lim na lim.

¹⁰ Ano wo bo limi jia. Bo ko elkohn efong bio na abal kanne bo go mmvtv akpakenti, fere rod abon ebo song kak go ega.

¹¹ Bo kehm rodo elkohl atahm Jehova kunu o mmvtv akpakenti, budu elkohl ni bo kake enyamatv agul, amongo agul nya li go elfoongo afahl.

¹² Owo adamagbudu kehm lohko tahm asongo go mbang nyio nyi Beti Semesi, jo biingi mbang mbang, bo tikem yange feere ejang eboblum afi ejang ebobkal. Atubesi anebe Filista jo toono bo tete bo song rehng nkonandi nyi Beti Semesi.

¹³ Wo anebe Beti Semesi jo kiimi arasi go edamme, eji bo tabe asamahr nyehn elkohl atahm, bo bele eyebatahng sehng eji bo nyehne ano.

¹⁴ Mmvtv akpakenti nyio kehm song yange go egbe ji Josua nnea Beti Semesi, edi jio wo sa no yiimi kohlo egburu eltal. Ane bao kehm wake akpakenti nya mmvtv nyio, ko kono agun, ko efong bio, lim njom nyi eljahme fi, ka Jehova.

¹⁵ Anabe et'tohngo ba Levi kehm yehke elkohl atahm Jehova bum ndi, a nsol nyi bo ko agul mong kunu go egburu ekpartal. Efung bio anebe Beti Semesi limi njom nyi eljahme fi, a ajom nyako ka Jehova.

¹⁶ Atubesi alon ba anebe Filista, nyehne nsol nyia kpee, owo bo kehm feere ebo efung b'nehm o kehng go Ekron.

¹⁷ A wo li nsol njom aka agul nya anebe Filista tumu no tv Jehova, nya bo ma lim ebi nya nya a, anyehng jolo ka Asdod, nyako jol ka Gaja, nyako jol ka Askelon, nyako jol ka Gati a Ekron.

¹⁸ Nfange enyamatv agul jolo toono ana nfanga nsi Filista jolo no, nya jolo ka atubesi alon ebo, nsi nyia nyi jolo agburu nsi nya bo lange akahme senng, go abon ejahbe ba nse. Egburu ekpartal ji abalimajom bumu elkohl atahm Jehova li ntianse tete rehng lela go edi egbe ji Josua nnea Beti Semesi.

¹⁹ Wo Esowo wulu ane bandiki ba lene o Beti Semesi, ane atahl ara ane ewubu ba kpo no, tib eji bo fahng go atahng elkohl atahm Jehova. Ane bao jolo ndon ndon sehng tib go egburu nfem nyi Jehova ma lim abo

²⁰ wo anebe Beti Semesi kehm bahbe re, <<Nne awoo bahke ma yiimi go esamahr bi Jehova, Esowo bia bi li saang? Eji nne awoo elkohl atahm nia bahke j'je song jol a ne, l'tahm a?>>

²¹ Owo bo kehm tumu atiingi etib tv anebe Kiriad Jearim rea, <<Anebe Filista ebfeere elkohl atahm Jehova. Baan, wahn ba rod song ani go egahne ejahbe.>>

7

¹ Ano wo anebe Kiriati Jearim kehm bake ba rod elkohl atahm Jehova. Bo ko song bum go etahk Abinadab go ewong, fere yehke Eleaja mmon ewe re á jo baabe elkohl atahm Jehova.

² Ngare nyio elkohl atahm nio jolo go Kiriati Jearim ekidi l'lab, jolo o nnya eltahl kohro kohro.

Samuel ga anebe Filista go Mijipa

Owo anebe Isreel kpee, kehm fere senngge, feere ba tob Jehova.

³ Wo Samuel kehm tongo anebe Isreel kpee re, <<L'jol re wahn ebsenngge feere goji Jehova a ntim a ntim enyahne, yaken ajen asowo nyako kpee, a Astoreti, wahn fere yake elnahne ka Jehova, fere jo loko ye ntahng ntahng, á bahk-n tahre yehke go ebo bi anebe Filista.>>

⁴ Ano wo anebe Isreel lohko yake Baal ebo, a Astoreti fere jo loko Jehova ntahng ntahng.

⁵ Owo Samuel kehm bungu re, <<Nong anebe Isreel kpee kono asi edi ajehng go Mijipa, m bahke gboongo Jehova ka bo.

⁶ Eji bo ba kono asi go Mijipa, bo kehm tohngo* alahb ba wohngo go esamahr bi Jehova ana ejum njom, efung bio bo bade njal, fere fvvrv abiafem re, <<Wahr eblim abiafem bade Jehova.>> Ngare nyia Isreel jo kono elwane edi ajehng go Mijipa, Samuel wo jolo ntubesi abo.

⁷ Eji anebe Filista wuku re, anebe Isreel ebsong kono go Mijipa, atubesi anebe Filista kehm bake re bo ba nok a bo. Eji anebe Isreel wuku ano, bo jo ffahl tib anebe Filista.

* **7:6 7:6** *tohngo* tuku

⁸ Bo bungu tong Samuel re, <<Ka tiki rahke ellingi tob Jehova ka-r, ye ji li Esowo ebahre, eji á l'for-r yehke go ebo bi anebe Filista.

⁹ Owo Samuel kehm koko mmonjoro no kp'kpeka yab abel, lim njom nyi eljahme fi kpee ka Jehova. Á lingi tob Jehova tib go esi ji anebe Isreel. Jehova faang-e faange.

¹⁰ Eji Samuel jo lim njom nyio nyi eljahme fi, anebe Filista kp'jeere kabbe anebe Isreel re bo ba bohko bo ebta. Wo efung bio Jehova ta ndan nyi sahb w'wahl tv anebe Filista nyi ka bo egburu elfahle ni Esowo limi anebe Filista bo be go esamahr anebe Isreel.

¹¹ Anebe Isreel bohngo lohng go Mijipa jo kam anebe Filista, jo wul bo mbang mbang tete kabbe edamme ji ejahbe Beti Kar.

¹² Owo Samuel kehm rodo eltal lo go elka elka ni Mijipa a Sen. Á lungu eltal nio re, Ebenejer, fere bung re, <<tete anv, Jehova kp-r kake ebo.>>

¹³ Ana wo anabe Isreel ga anebe Filista, bo kehm rahke elnoko go ndi anebe Isreel. Go afung nya Samuel jolo go elkpín, ebo bi Jehova tiki kuumu anebe Filista.

¹⁴ Ajahbe nya bomo go Ekron song rehng Gati nya anebe Filista noko no ko go ji anebe Isreel, Isreel fere taare anebe Filita kpee, Isreel tahre abon ajahbe ba li senngé bo kak go ebo bi anebe Filista. Owo elkoono kehm jolo anebe Isreel a anebe Amor.

¹⁵ Samuel soro asi jol ntubesi no anebe Isreel go afung kpee nya á jolo go elkpín.

¹⁶ Go elya anehng anehng á jo sehng go ntoora mbang, bomo go Betel rehng go Gilgal, tete tob rehng go Mijipa, jo lam anebe Isreel go adi nyao kpee.

¹⁷ Wo fvfo á jo tiki feere go Rama ji jolo ejahbe eje, edi ji etahk eje jolo no, fvfo o wo á jo lam anebe Isreel. Á si egudu njom o ka Jehova.

8

Anebe Isreel bahbe re bo bel ntul

¹ Eji Samuel ma kul, á yehke abon ebe ba nlum re bo jol atubesi anebe Isreel.

² Ngbokambang a mmon ewe bo jo lung-e re Jowel, etoono bo jo lung-e re Abija, bo jolo abalamalam go Beeseba.

³ Wo abon ebe joom toono abang nya nde ebo jo toono, bo yaange jo lim nsol nyi jo ka bo nsehng akpohko, jo ko ngu, fere jo bvvrv alam.

⁴ Owo anebkul Isreel kpee kehm kono asi lohng ba goji Samuel go Rama.

⁵ Bo ba tong-e re, <<Wobkul, abon eba ba nlum nehme toono abang enya, anv yehke ntul no bahk-r fili, elkohn ni ajahbe nyako kpee kpi no.

⁶ Eji bo tongo re, <<Ka-r ntul no bahk-r fili,>> ejum jia Samuel atahng we-e yebem; á kehm kake ero ka Jehova.

⁷ Owo Jehova tong-e re, <<Wuungu atung go nsol kpee nyi ane baa kpa-a tongo, wo sang bo kpa-a tene, me wo bo ma-m ten ana ntula bo.

⁸ Ano wo bo ma limi bomo efung bi n yehke bo lohng go Ijib tete ba rehng lela, bo ma-m ten,

kp'fere song loko asowo nyako, ano wo bo kp-a tob lim.

⁹ Anv wuungu bo atung, fvfo sahb r'rehke bo t'tahne wo tong bo, ana elkohn ntul noo bahke jolo, á l'kehme bo fili.

¹⁰ Samuel tooro alum nya Jehova tong ane ba jo bahb-e re á ka bo ntul.

¹¹ Á bungu re, <<Ji ji a ji ntul no bahk-n fili bahke koko ana j'je, á bahke koko abon ebahne ba nlum lim bo jo loko go mmvtv akuungu a any'nya, bo bahke jolo go mbuksong mmvtv akuungu enye ana ab'baabe.

¹² Bo jimongo á bahke yehke bo re bo jol atubesi nsoja jo fili ane atahltahl atahltahl, bo jimongo bahke jo fili ane atahlabal ewubu, atahlabal ewubu, bo jimongo bahke bahm egbe eje, fere jo kpa, jol tvtv o, bo jehko bahke jo tahl nsol ebta a nsol nyi li ka mmvtv akuungu.

¹³ Á bahke rodo abon ebahne ba nkal bum, bo jo lim akehng es'svv eleenge, fere jol abalame nsol a abakaange nsol.

¹⁴ Á bahke koko adi ndi enyahne nya ga nob, a adi ebgbe oliv enyahne, egbe avaen, a abohko oliv, faake a nya ka alokeltum ebe.

¹⁵ Á bahke jo yehke ejum ajehng go nsol ewubu anyehng anyehng ana nkohl, agreb faake a nya ka alokeltum ebe, a atubesi abalimeltum ebe.

¹⁶ Alokeltum ba nlum a alokeltum anebkal ebahne, a adamagbudu enyahne nya nno, a ebvankang, á bahk-n taare jol nyanye.

¹⁷ Á bahke koko ejum ajehng jio go nsol ewubu anyehng anyehng, go egahne atohkondi, wahn-fono antahng bahke jolo aju enye.

¹⁸ Efung bio l'rehng, m bahke lingi re bo tahr-n yehke go abo ntul no n yehke no. wo Jehova wahn nehm faange.

¹⁹ Wo ane bao t'ten elwuungu Samuel atung. Bo kehm bungu re, <<E'ee!>> <<Wahr kp'sebe ntul no bahk-r fili.

²⁰ Owo e bahke jolo ana ajahbe nyako kpee, eji e kpi ntul no bahke jo tv-r, fere jo lohng anahre jo nok nta enyahre.>>

²¹ Eji Samuel wuku nsol nyi ane bao bungu no, á tooro nsol nyio kpee tong Jehova.

²² Jehova kehm faange re, <<Wuungu bo atung, wo ka bo ntul.>> Owo Samuel kehm bungu tong anebe Isreel re, <<Nne awohng awohng song kehng go ege ejahbe.>>

9

Sol song kpiri Samuel

¹ Nne awohng jolo go, no lohng et'tohngo ji Benjamin, á gbale eljini, mbing enye bo jo lung-e re Kisi mmon no Abiel ji jolo mmon no Jeror, ji jolo mmona Bekorati mmona Afia ji lohng go et'tohngo ji Benjamin.

² Kisi bele mmon no nlum no bo jo lung-e Sol, á gbo ejangkun, bi nnene ki kpe jol ana ye go Isreel, á labe elkul ero sehng nne awohng awohng.

³ Ngare nyia, ebvankang bindiki bi nde no Sol ye ji bo jo lung re Kisi kehm tane, Kisi kehm tongo Sol mmon ewe no nlum re, <<Ko nlokeltum awohng, wo song a ne, song kpur ebvankang bio.>>

⁴ Owo bo kehm song sehng go ejahbe ewong ji Efriim, sehng tete rehng ejang erohko bi Salisa, wo bo nyehnem bo. Bo sehng rehng erohko ji ejang Saalim, wo ebvankang o jolem. Owo á fere sehng go nkphoko ejang ejahbe Benjamin, wo bo tikem nyehn bo.

⁵ Eji bo rehng erohko ejahbe ji Juf, Sol kehm tongo nlokeltum no jolo a ne re, <<Ba, wahr feere njahm, tohko jol ano nsoo bahke rahke eltiiri bade ebvankang, eltim bahk-e kehme elgbiingi bade anahre.>>

⁶ Wo nlokeltum noo faang-e re, <<Nyahne, ejahbe jia nne Esowo li o, á kpi ekpunu gbalee, ejum ajehng ajehng ji á l'bung kpo lohko jol go etingiting. Nong wahr tahm go anv. Fundiki á bahk-r tibi mbang nyi e bahke sehng.>>

⁷ Sol kehm tongo nlokeltum ewe re, <<E l'je, jenji e bahke kake nne noo? Nsol alehke ebmal egahre abam. Ayare e kpimm nya e bahke koko song ka nne Esowo. Ejum ajii e kpi no?>>

⁸ Nlokeltum kehm kpe faange re, <<Nyahne n kpi ebahk asilva a, m bahke kake nne Esowo, eji á l'tong-r mbang nyi e bahke sehng.>>

⁹ Mahne mahne, go Isreel nne l'tong re á bahb Esowo ejum, bo kpo bung re, <<Ba wahr tahm goji nne no kpo nyehn, tibre anyehnamahr ba lela bo kpo lung-e re any'nyehne.

¹⁰ Sol kehm tongo nlokeltum ewe re, <<Ebnob sehng, nong wahr tahm.>> Owo bo kehm tahme asongo ejahbe ji nne Esowo jolo no.

¹¹ Eji bo jo wahr ewong asongo go ejahbe, bo wane ellong agbahme kp'lohngo abake re bo ba

tohng alahb, bo kehm bahbe bo re, <<Nne no kpo nyehn amahr noa oa?>>

¹² Bo faang-e re, <<Ye noa, go egahna mbuk-song. Foomen anv; yeb tob ba egahre ejahbe lela, tibre ane kpi njom lim edi njom alimi.

¹³ N' l'si y'yel ejahbe, m bahk-e nyehne á kehm tahme go edi njom alimi song li nsol. Ane nehm bom nsol alehke tete á ba, tibre á bahke tiki fuulu njom; á l'lim ano mal, ane ba bo tiingi bo bahke kehm lehke. Songen go anv, m bahk-e nyehne ngare ny'nehm a.

¹⁴ Ana bo jo jen asongo go ejahbe re bo song yel me, nyehn Samuel ga kp'jene abake goji bo, ana á jo tahm go edi njom alimi.

¹⁵ Anv efung bi sene efung bi Sol kp'bake, Jehova ebtohko lennge ka Samuel re,

¹⁶ <<Behna ngare anana, m bahke tumu nne no lohng et'tohngo ji Benjamin tv-a. Kak-e akehng go esi, á jol nne no bahke fili ane ebame Isreel. Á bahke tahre bo yehke go ebo bi anebe Filista. Me n seenge ane ebame, tib aling ebo ma-n rehng.>>

¹⁷ Eji Samuel keebe amahr song nyehn Sol, Jehova kehm-e tongo re, <<A wo li nne no n tong-a no bade a ne; ye wo bahke fili ane ebame.>>

¹⁸ Sol kehm song gbede Samuel go eti mbu, kehm-e bahbe re, <<Titi á bahk-m ma tib edi ji etahk nne no kpo nyehn amahr li noa?>>

¹⁹ Samuel kehm faange re, <<Me wo li nny'nyehne.>> Song tahm go edi njom alimi, go edi njom limi, lela á bahke lehke nsol aname, wo efungfu m bahk-a tumu a song, fere tong-a nsol kpee nyi wob go ega eltim.

²⁰ Ana ebvankang bi tane no lela nfung era nyi ma sehng, ka kpe tiiri bada bo, bobnyehn bo. Nne awoo no, anebe Isreel kpee ma yehke ntir ebo kunu, wo sanga a et'tohngo eja kpeea?

²¹ Sol kehm faange re, <<Me sang lohng go nnahb nyi Benjamina, go et'tohngo ji Isreel ji ga sea, me sang nnahb enyame ga rennge go et'tohngo ji Benjamina? Jenji wahnge a kp'bungu elkohn ejum ana jia tob-m?>>

²² Owo Samuel kehm koko Sol, a nlokeltum ewe ba yel ekp'kpa fere jehke bo go mbuksong ane ba bo tiingi no, bo jolo ejum eltahl ane awubu go nfange.

²³ Samuel kehm tongo nlamansol re, <<Ko mmofv nyam no n ka-a no ba, no n tong-a no re wo bum eje eje.

²⁴ Owo nlamansol kehm rodo eyo enyam a mmofv nnyam song bum go alata nya Sol. Samuel kehm bungu re, <<Ji ji a ji m bum-a no. Li tibre m bumu eje eje ka wo go elkak nia bomo ngare nyi n tongo re, <Me n tiingi ane.>>> Sol li nsol a Samuel efung bio.

²⁵ Ngare nyi bo fere badde edi njom alimi ba rehng go ejahbe, Samuel bung a Sol go ege ero etahk.

²⁶ Bo kehm mehle ngare nyi edi yahke lennge, Samuel kehm lungu Sol go ero etahk, <<Tahm toobo ebjing, m bahk-a tumu a feere kehng go ega eljen. Eji Sol toobo ebjing, ye a Samuel, bo kehm lohngo elatahk.

²⁷ Eji bo jo jen asongos go esi ejahbe, Samuel kehm tongo Sol re, <<Tong nlokeltum ewa re, á tohk-r gbo mbansg song tahm.>> wo, tohko sa a

mmongare ntiil, eji n l'tiing-a etib bi lohng goji Esowo. Ano wo nlokeltum no limi no.

10

Samuel wohngo Sol akehng

¹ Owo Samuel kehm rodo elom akehng oliv yaange wohngo Sol go esi, fere sod-e nnyo, kehm bungu re, <<Nyhne Jehova ma-a wohngo akehng re wo jol ntubesi no ane ba á ma li elkelkv.>>

² A l'tahm-m sa a lela, a bahke wane aneblum abal kohlo elahm Rasel, go Jelja go nkonandi nyi Benjamin. Bo bahk-n tongo re, 'Ebvankang bi a lohngo re wo song seb bobnyehn bo. Anv nso ebrahke ebtiri bade a bo, yeb fere kp'gbiingi bade a na. Á kp'bahbe re, <<Jenji m bahke limi bada mmon ewame?>>

³ Wo a bahke soro asi o asongo tete a rehng go egburu elrahn eti Tabor. Ane era ba kp'tahme song kak Esowo go Betel bahk-a kpiri o. Awohng bahke solo abon mbul baange ara, noko abon ngbu abred ara, noko bahke fili eyahbe ji bo ko ngu nyam lim.

⁴ Bo bahk-a kake nnyo, fere yar-a ka ngbu ebred ebbal, nyi a bahke koko go ebo abo.

⁵ L'jol ano, a bahke jeke go Gibeá go ewong ji Esowo, go edi ji atimbu anebe Filista li no. Eji a kp'yele ejahbe jio a bahke wane ellong abanyehnamahr kp'lohngo na edi njom alimi abake, bo fili atalehk, agehmegehme, atang, a abuk kp'kubu go ebo esamahr, bo bahke kehme amahr nyehn.

⁶ Etohko ji Jehova bahke bake a na nsahm nsahm, a bahke kehme amahr nyehn a bo; wo, a bahke yaange jol nne nondikandiki.

⁷ Nliingi nyia l'si j'jol ano a na , lim ajehng ajehng ji abo enya sebe re wo lim, tib Esowo li a na.

⁸ Gbo-m mbang wo song go Gilgal. M bahke tiki ba o ba lim ajom nya eljahme fi, a ajom nya elkoono, wo a bahke jehke sik go nfung na esehma tete m ba go ega, ba tong-a ji a bahke limi.>>

⁹ Ana Sol sennge re a yake Samuel, Esowo soro yaange eltim Sol, nliingi nyia kpee lohko jol ano efung bio.

¹⁰ Eji ye a nlokeltum ewe rehng go Gibe ellong abanyehnamahr soro ba kpir-e, Etohko ji Esowo ba bul-e a nsahm a nsahm, á soro semme a bo jo nyehn amahr.

¹¹ Eji ane kpee ba kpe-e kahne wuku wuku nyehne no re á kp'nyehne amahr a abanyehnamahr, bo jo bahbe atemtem re, <<Jenji ma jol a mmon no nlum no Kisi? Anv, Sol fvfo tob wob go ellong abanyehnamahra?>>

¹² Nnenlum no lene o kehm faange re, <<Nne awoo li nde abo? Kehm fere jol ejum elbungu re, <<Anv Sol tob wob ellong abanyehnamahra?>>

¹³ Eji Sol ma rahke amahr anyehne, á tahme edi njom alimi.

¹⁴ Owo mmonannyehn nde kehm-e bahbe a nlokeltum ewe re, <<Gan wo n je no?>>

Á kehm faange re, <<E song sebe ebvankang. Wo eji e sebe kahn re e nehme nyehn bo, e sehng je goji Samuel.>>

15 Mmonannyeahn nde tong-e re, <<Tong-m ji Samuel buntu no tong-a.>>

16 Sol faange re, Á lim-r re wahr kahn re, bob-nyehnd ebvankang. Wo á tongem mmonannyeahn nde bade ana Samuel tong-e no bade etul alehke.

17 Samuel kehm kuku anebe Isreel re bo ba kono edi ajehng go esamar Jehova go Mijipa.

18 Kehm buntu tong bo re, <Ji ji a ji Jehova Esowo bi anebe Isreel kp'buntu re, <<Me wo yehke anebe Isreel go Ijib lohng a bo, fere tahr-n yehke go nsahm nyi Ijib, tob tahr-n yehke go abo nya atul kpee ba jo nohk-n.>

19 Wo anv wahn ebten Esowo ebahne, ye ji kpo tahr-n yehke go atongtong a ajoobo arem. Wahn ebbung re, <<E'ee yehke ntul no bahk-r fili.>> Anv, konen elnahne go esamahr Jehova, go et'tohngo et'tohngo, a ebangenahb ebangenahb.>>

20 Eji Samuel ma lim re anebe Isreel kpee lohng ba go et'tohngo et'tohngo, et'tohngo Benjamin ji elfaange gbo tub bo.

21 Á kehm yehke et'tohngo Benjamin lohng aji go es'song, ebangenahb, abangenahb, ebangenahb ji Matri ji bo yehke no, es'kohro jolo Sol mmon no nlum no Kisi ye wo bo yehk-e no. Wo eji bo kpur-e no, bo w-e nyehnem.

22 Owo bo kehm kpe bahb Jehova re, 'Anv, nne noa ebtiki rehng a?

Jehova re <<Ee, yebbehr elne go ellong nsol.>>

23 Bo kehm beke song yehk-e lohng a ne, ana á ba yiimi go ellong ane bao, ye wo ga lab, fere y'yoongo sehng ane bako.

²⁴ Samuel kehm bungu tong ane kpee re, <<Wahn ebnyehn nne no Jehova ma yehka? Nnene limm no li ana ye go ellong ane kpee.>>

Owo ane bao kehm rabe re, <<Nlaabe elkpín jol ka ntul!>>

²⁵ Samuel kehm lennge ka ane, eljini ni li ka eti etul, a ntum etul. Á nyono kak nwer nyi bo kpo fehd na, rod song bum esamahr bi Jehova. Owo Samuel kehm yaame ane, re bo song kehng bo eboa ntahk.

²⁶ Sol fvfo tob tahm eje kehng go ege etahk go Gibeá, a ellong ane ba toon-e no, ba bele etahneltim ba Esowo ma koro bo.

²⁷ Abvrv ane bandiki bungu re, <<Yaaa, ye jia bahk-r ma tahra yeke go abo nya anebe ekv ebahra? Bo ten-e, bo w-e yarem ka ejum ajehng ajehng. Wo Sol belle eje.>>

11

Sol tahre ejahbe Jabesi

¹ Nahasi nnea Ammon kehm mehle tahm song bohko Jabesi Gilead ebta. Aneblum Jabesi kehm-e tongo re, <<Ba ko nwongo anahre, wahr fere jo lok-a.>>

² Wo Nahasi nnea Ammon kehm faange re, <<M bahk koko nwongo anahne tib ejum, m bahke luudu nne awohng awohng ewahne elmahr eboblum ene eji l'jol esono ka anebe Isreel kpee.>>

³ Anebkul Jabesi kehm-e tongo re, <<Ka-r nfung esehma eji e l'mal tum attingetib tv anebe Isreel; nnene tohko fere ba tahr-r, wahr bahke yake elnahre ka-a.>>

⁴ Eji atiiingetib je go Gibeá ejahbe ji Sol lene no, song tooro nsol nyia tong ane, bo kpee soro kehme ellingi wahre wahre wahre.

⁵ Ngare nyio Sol kp'tob kehng na kehng go gbe jo toono efong ebe go njahm, á kehm bahbe re, <<Jenji ma gbo a ane bao? Jenji wahng ane bao kp'lingi? Bo tooro tong-e ana aneblum Jabesi ma ba bung.

⁶ Eji Sol wuku alum ebo, Etohko ji Esowo soro ba a ne, a nsahm a nsahm, atahng soro rake.

⁷ Á rodo alum efong ebal, ja bo jed jed jed, fere tum atiiingetib re bo song a nyi goji anebe Isreel kpee, fere jo tooro re, <<Ji ji a ji bahke limi efong bi nne awohng awohng no tohko toono Sol a Samuel.>> Owo elfahle ni Jehova kehm gboko tub ane, bo kehm lohngo ba rur edi ajehng, are nne awohng wo.

⁸ Eji Sol fange bo go Bejek, aneblum ba Isreel jolo ane atahl alon alon nkpel atahl asehma ane atahl ewubu, (300,000), go Juda jolo atahl alon alon nkpel atahltahl atahl awubu. (30,000)

⁹ Bo kehm tongo atiiingetib ba ba no re, <<Tongen aneblum Jabesi Giled re, <Ngare nyi njul l'fub behna, bo bahk-n tahre.>> Ngare nyi atiiingetib bao feere no, song tong aneblum ba Jabesi, ka bo eyebatahng.

¹⁰ Bo kehm tongo anebe Ammon re, <<Behna e bake yake elnahre ka-n, n lim-r ejum ajehng ajehng ji kor-n no.>>

¹¹ Njahm fungfu nyehko Sol kehm yabe ane ebe go nlong era; N kpese efungfu bo ya yel go ebehre ji anebe Ammon, fere wul bo tete njul fub, bo ji

foro no be yaame, jol ane abal jolem ba kpe sa edi ajehng.

Sol bo liing-e ana ntul

¹² Ane kehm tongo Samuel re, <<Ane a baa jo bahb re, 'Anv, Sol wo bahk-r fila?' Koon ane baa ba ka-r, wahr wul bo.>>

¹³ Wo Sol bungu re, <<Tibre Lela nnene bo we nehm wul, lela Jehova eltahre anebe Isreel!>>

¹⁴ Owo Samuel kehm tongo ane re, <<Baan, wahr tahmen go Gilgal kpe song tuungu liingi etul bi Sol.>>

¹⁵ Ano wo ane kpee kehm mehle tahm go Gilgal song liingi Sol ana ntul go esamahr bi Jehova. Owo bo limi ajom nya elkoono ka Jehova, Sol a anebe Isreel kpee limi egburu elkak.

12

Es'kohro Alum Nya Samuel

¹ Samuel kehm bungu tong Isreel kpee re, <<Me n wuungu atung wuk ejum ajehng ajehng ji n ma bung tong-m, m ma-n ka ntul no bahke jo fil-n.

² Anv, wahn ebbel ntul ana nne no bahke jo tv-n. Wo ana me a, me n kul mahng abi, abon ebame ba n lum baa anahne, me n jol nne no ma-n fili bomo eji n li njangkun tete tub lela.

³ Nyehn me ga yim no. Sahben bung ebi bade aname go esamahr bi Jehova a nne ewe no á kak-e akehng go esi. Nne awoo me, no m ma taare nluma nfong enye? Nne awoo me, no m ma taare mbvankang enye? Nne awoo m me-e nehm? Nne awoo me, no m me-e kak erem. Go abo nne awoo no, m ma ko ngu nyi bahk-m bulu amahr? L'jol

re me n lim ejum ajehng ajehng go nsol nyia, m bahke tuungu lim nob.>>

⁴ Bo kehm faange re, <<Wahr a ka nehm, jol wahr a ka kak erem. A ka k'ko ejum ajehng ajehng go abo nne.>>

⁵ Samuel kehm tongo bo re, <<Jehova kp'yiimi ntianse ka-n, nne no á kake akehng go esi kp'tob yiimi ntianse lela re, ejumjum go egame abo n nyehnem.>> Bo kehm bungu re, <<Á li ntianse.>>

⁶ Owo Samuel kehm tongo ane re, <<Jehova wo yehke Mosis abola Eron, bo song yehke babnso ejahne go Ijib.

⁷ Anv, yiimen tibre m bahk-n gbiiri go akpade, go esamahr bi Jehova go atingi nsol kpee nya Jehova ma lim ka wahn a babnso ejahne ji nkul.

⁸ Eji Jakob yele go Ijib, bo lingi tob Jehova re, á kak bo ebo, Jehova tumu Mosis abola Eron, bo ba yehke babnso ejahne ji nkul go Ijib, bo ba lene edi jia.

⁹ Wo bo yini Jehova Esowo ebo; ano wo á gungu bo kak abo nya Sisera, ye ji jolo ntubesi nnea nsoja no Hajo, a abo nya anebe Filista, a ntul no Moab, ye ji noko a bo.

¹⁰ Bo kehm lingi tob Jehova re, <Wahr eblim abiafem; wahr ebten Jehova, fere kp'loko Baal a Astoreti.> Anv tahr-r yehke go abo nya anebekv ebahre, wahr bahke fere jo lok-a.>

¹¹ Owo Jehova kehm tumu Jerubaal, Barak, Jefta a Samuel, á tahr-n yehke go abo nya anebekv ebahne kpee ba li senng-n kak, wahng ka n jol go elforo.

¹² Wo eji ń nyehne re, Nahasi ntul no Amon jo ba elnoko anahne, ń tong-m re, <E'ee e kp'sebe ntul no bahk-r jo fili.> Jol tvtv o re Jehova Esowo ebahne wo li ntul ewahne.

¹³ Anv, nyehnen ntul no wahn fono yehke no, ye ji ń bahbe no; nyehnee Jehova ma-n ka ntul.

¹⁴ ń l'fere fahl Jehova, lok-e fere wuk-e, k'jo nok a atahm enye, l'fere jol re, wahn afi ntul no kp-n fili, ń bahke toono Jehova Esowo ebahne, jio bahke nobo!

¹⁵ Wo ń tohko fere wuk Jehova, ń l'fere jo nok a atahm enye, ebo ebe bahk-n kuumu ana kuumu babnso ewahne ba nkul.

¹⁶ Anv yiimen t'tahne wahn nyehn egburu ejum ji Jehova yahke lim egahne esamahr.

¹⁷ Anv ngare nkohl sak akiimi sanga? M bahke lungu Jehova, á tum ndan a elahb. Owo ń bahke liingi elkohn ejum ji ń ma lim go esamahr bi Jehova, eji ń bahbe re ń kp'sebe ntul.

¹⁸ Owo Samuel kehm lungu Jehova efung b'nehm, Jehova tumu ndan a elahb. Ane bao kpee fahle Jehova, a Samuel.

¹⁹ Bo ane kpee kehm tongo Samuel re, <<Kak ero ka Jehova Esowo eba, go esi alokeltum eba, eji e l'k'kpo, tibre wahr ebkpe budu elnahre abiafem nyako kpee, ebi ji e bahbe re wahr bel ntul.>>

²⁰ Samuel kehm faange re, <<Kana kpe fahl. jol afii wahn eblim abiafem nyaa kpee, jol kana senngé Jehova njahm, wo jo loken Jehova kpee a ntim a ntim enyahne.

²¹ Kana tiki senngé toono alokelom nya ki lohng ejumjum. Bo nehm lim ejum ji nno ka-n,

jol bo wahn nehm ma tahr-r, tibre bo lohngem ejumjum.

²² Tib go esi ji egburu mbing enye, Jehova nehm tiki ten ane ebe, tibre Jehova atahng yebe sehng re á lim-n wahn jol ane ba be.

²³ Ana me, ndan gbaa re, me n lim abiafem tob Jehova, k'kak ero ka-n. M bahk-n tibi mbang nyi kp'nobo, a nyi li go nseenge.

²⁴ Wo fvfo lohko jol re n kp'fahle Jehova, fere bel ekakesehk jo lok-e, a ntim a ntim enyahne kpee; jo gbo-n ntir bade elkohn agburu nsol nya á ma lim ka-n.

²⁵ Wo n l'fere soro asi go ab'bi alimi, lohngo re wahn, a ntul ewahne, n bahke kpoko tan.

13

Samuel Nyame Sol

¹ Sol kange eltahl a nnya ewubu bo kehm-e bobo etul, á fili anebe Isreel go nnya atahl abal a nnya ebal.

² Sol jake aneblum Isreel, ane atahl alon alon eltahl a edi ewubu, ane atahl alon alon go edi eltahl, jolo a ne go Mikmasi, go awong nya ejahbe Betel jolo no, ane atahl alon alon edi ebwubu. jolo a Jonatan go Gibeá ji Benjamin. Erik aneblum bako á tumu bo, bo feere kehng go eboa ntahk.

³ Jonatan jo noko a anebe Filista go ebud ji nse ji Geba, anebe Filista w'wuk. Owo Sol kehm woro ntang go ndi nyio re, <<Nong anebe Hibru wuk! <<

⁴ Ano wo anebe Isreel kpee wuku etib bio re, <<Sol kp'noko a anebe Filista go ebud ji nse, jia limi re, anebe Filista bel etehne bade anebe

Isreel,>> Bo kehm kuku ane re bo kpiri Sol go Gilgal.

⁵ Anebe Filista lohngo ba kono asi re bo nok ebta a anebe Isreel, amvtv ebta jolo atahl alon alon go eltahl edi ebwubu (3000), ane ba woomo amvtv ebta jolo ane atahl alon alon edi atahlara (6000), nsoja ruru are erikendi nkpe aya bi. Bo mehle song noongo edi erekekv ji Mikmasi, go ero nfam bi Beti Aven.

⁶ Eji anebe Isreel nyehne re edi ebnyaame bo, nsoja ebo edi ebriidi bo, bo be biiri agohng, mbad, jolo go akpartal, go abing, a abing nya bo kpo kuuru alahb.

⁷ Egom anebe Hibru jindiki siiri aya Jodan song rehng ndi nyi Gad a Giled, Sol sa go Gilgal, ellong nsoja kpee nyi jolo a ne, gbo ngbabohngo elfahle.

⁸ Á ji sik go nfung esehma, ngare nyi Samuel kake no, wo Samuel tikem ba ga Gilgal, aneblum ba jolo a Sol kehme elyaame.

⁹ Owo Sol kehm tongo re, <<Koon nsol njom nyi eljahme fi, a njom nyi elkoono ba ka-m. Sol kehm limi njom nyi eljahme fi.

¹⁰ Ana á limi njom nyio mal, Samuel kehm soro ba rehng, Sol je re á song kak-e nnyo.

¹¹ Samuel kehm-e bahbe re, <<Jenji á ma lim? >> Sol faange re, <<Eji n nyehne re aneblum ebkehme elbeke yaame, wo nehme ba, ngare nyi e kake no, ga anebe Filista ebkono asi go Mikmasi,

¹² n tiri, <Anv anebe Filista bahke badde ba kpir-m go Gilgal, gana n ka bahb ekakebo ji Jehova.> Owo wahnge m bobo lim njom nyi eljahme fi.>>

13 Samuel kehm bungu re, <<Woblim egboolo ejum. Á bumem elkahn ni Jehova Esowo eba ka-a no; li re a bumu bum, Esowo jol limi eti etul eje gbal kpee ngare anyehng anyehng go Isreel.

14 Wo anv etul eba nehm kpin, Jehova ebseb nnenlum no kp-e koro go ege eltim, yehk-e re, ye wo bahke fili ane ebe, tibre a taamem bum elkahn ni Jehova.>>

15 Samuel soro tahm o Gilgal song rehng go ejahbe Gibeá ji li go erohko ji et'tohngo ji Benjamin. Sol fange aneblum ba sa a ne. Bo jolo ane atahl alon alon edi ebrakebra.

Anebe Isreel nsol ebta bo belem

16 Sol a Jonatan mmon ewe, go ane ba jolo a ne, bo sa go Gibeá ji li go Benjamin, anebe Filista jolo go Mikmasi.

17 Abanoko ebta mbehre mbehre lohngo go edi erekekv ji anebe Filista, bo jolo nlong era. Ellong anehng senngé asongo go Ofra go nkpohko nyi Sual,

18 ellong nehko lohng asongo go Beti Horon, go ellong ni biingi nlong era, bo mehle asongo go nkonandi jo seenge edamme ji Jeboyim ji li feere go elka emahng.

19 Nne etahl awohng awohng kpeem jol kpee go ndi nyi anebe Isreel, tibre anebe Filista ebbung re, <<Tohko jol ano anebe Hibru bahke limi akahngkahng, afi nkong!>>

20 Anebe Isreel jo badde tahm go Filista re bo song bange agburu eblu, eblu bi nse, nfuk, a ebtahme.

21 Ekun bi kimi go elbange, eblu bi nnen, eblu bi nse, jolo ejum esikel ebbal, nfuk, elkong arrange,

a nfuk, a nkong nyi bo kpo ko kam adahmagbudu jolo esikel ajehng.

²² Wo efung ebta nne a nsoja awohng awohng no jolo a Sol a Jonatan, jolem no bele ekah-ngkahng afi elkong go ege ebo; Sehngem Sol a Jonatam mmon ewe, bo ba bele.

²³ Ngare nyia anebe Filista tumu nsoja ebo re bo song sahd mbang nyi li elka elka ni abon awong ba li asongo go Mikmasi.

14

¹ Efung abehng Jonatan mmona Sol kehm tongo njangkun nyi jo fili nsol ebta enye re, <Ba, wahr siiri edamme tahm go edi erekekv ji anebe Filista go ejang behko. Wo Sol nde á we-e tongem.

² Sol jolo ga esi ejahbe ji Gibeá go nnahb pomegranati go Mikron. Aneblum ba jolo a ne jolo rehng ane atahltahl atahlawubu,

³ go ellong ane bao, noko bo jo lung-e re Ahija, ye kake nkpehrekahbe ewobo ji nlimanjom. Á jolo mmon no nlum no mmonannyehna Ikabod, no bo jo lung-e re Ahitub, Ahitub mmon no Finehas mmon Eli, ye ji jolo nlimanjom no Jehova go Silo. Nnene kahnem re Jonatan eblohng eje fi.

⁴ Mbang mbang nyi Jonatan jo seb re á ta mbang sehng song rehng go edi erekekv ji nsoja anebe Filista, agbung gbung awong jolo ejang abbal abbal. Ewong jehko bo jo lungu re Bojeji, jehko bo jo lung re Sene.

⁵ Eltal noko yiimi go ejang ebobkal nfam kohlo ejahbe ji bo jo lung re Mikmasi, nehko go ejang eboblum kohlo ejahbe ji bo kpo lung re Geba.

⁶ Jonatan tongo njangkun nyi jo fili nsol ebta enye re, <<Ba wahr tahm go ebud ji nse ji aneblum ba ki nyi Esowo, bo ji kil jo yehke nrur, fundiki Jehova bahke limi ejum tib go egahre esi. Ejumjum limm ji bahke ma kpan Jehova k'tahre, afi jolo ellong ni kp'gbale, afii ni kp'seke.>>

⁷ Nf'fila nsol ebta enye bungu re, lim ejum ajehng ajehng kpee ji wob-a go eltim, song a ne, me n li a na eltim anehng, a etohko.>>

⁸ Jonatan re, ba no lun, wahr siiri song kpiri bo, nong bo nyehn-r.

⁹ Bo l'bung tong-r re, <<Yiimen o tete wahr ba kpir-n,' e bahke sake edi ji e li no, e nehm je goji bo.

¹⁰ Wo bo l'fere tong-r re, 'Baan ga egahre,' e bahke wahre je, tibre jia ji bahke jolo elliingi enahre re Jehova ebjabbe bo kak-r go abo.>>

¹¹ Owo bo egom egom kehm lohngo gbuul go ebud ji anebe Filista. Anebe Filista re, <<Nyehnen!>> <<Anebe Hibru kp'tohngo lohng abing nya bo biiri no.>>

¹² Aneblum ba jolo go ebud kehm rabe tob Jonatan, a nfila nsol ebta ewe re, <<Baan ga egahre, e bahk-n tibi n nyehn ejum.>>

Owo Jonatan kehm tongo nfila nsol ebta ewe re, <<Wahr, toon-m, Jehova ebyake bo kak ebo bi anebe Isreel.>>

¹³ Jonatan jo ko abo enye a akpade enye wahr, nfila nsol ebta ewe jo wahr toon-e go njahm. Anebe Filista gbo yel go ebo abo. Jonatan wulu anebe Filista ba jo nok a ne go mbuksong, fvfo nfili nsol ebta ewe wulu ane ba jo nok a ne ga njahm.

¹⁴ Go ngbokambang enok bia Jonatan a nfila nsol ebta ewe, bo wulu aneblum eltahl go morohko edi ntiil no efong bahke ma job efung abehng.

Anebe Isreel Kame Anebe Filista

¹⁵ Elfahle kehm gboko tub nsoja kpee nyi jolo go edi erekekv, a nyi jolo go ekulugbe, bo jolo go ebud ji nse, a nlong nyehko, fvfo ndi gbehke. Esowo bi tumu elfahle nia tv bo.

¹⁶ Anebe Sol ba kpo baabe adi go Gibe a ji Benjamin, nyehne nsoja ma yal elkpa kp'beke asongo adi adi.

¹⁷ Owo Sol kehm tongo aneblum ba jolo a ne re, <<Fange nsoja wahr seb kahn nne no ma lohng egahre ellong. Eji bo limi ano, bo sebe kahn re Jonatan a nfila nsol ebta ewe, bo ba ki li.

¹⁸ Sol kehm tongo Ahija re, <<Ko elkohl atahm Esowo ba a ni.>> (Ngare nyio elkohl atahm jolo goji anebe Isreel.)

¹⁹ Eji Sol kpi mbungu mbungu a nlimanjom, ejooko kpe gbal na budu go abud nya anebe Filista. Wo Sol feere tong nlimanjom re, <<Yehke ebo eba ka wake ko elkohl atahm ba.>>

²⁰ Owo Sol kehm lungu aneblum kpee ba kono edi ajehng, mehl tahm ebta. Bo nyehne re anebe Filista kpee amahr ebbil bo, bo jo kehme atemtem boomo go ebo akahngkahng.

²¹ Anebe Hibru ba tohko jol wuku wuku a anebe Filista, bo ji jolo a bo go ebo ebud, bo be lohng song yel anebe Isreel ba jolo a Sol go Jonatan.

²² Eji anebe Isreel kpee ba biiri go ejahbe ewong ji et'tohngo ji Efriim wuku re anebe Filista

kp'beke asongo, bo tob yele ebta sahb f'fub jo kam bo.

²³ Go mbang ana nyia nyi Jehova tahre anebe Isreel, ebta bia soro asi siiri Beti Aven.

Jonatan Yabe Akehng Ekon

²⁴ Efung bio jolo ejahkjahk efung ka anebe Isreel, tibre Sol gbaange ane kpee ko nwongo rea, <<Nkuk jol a nne awohng awohng no l'li nsol, elgung kehm bake, tete me n tohko bongo anebekv ebame go nsol nyi bo ma-m lim!>> ellong nsoja anehng anehng tikem li nsol efung bio kpee.

²⁵ Ellong nsoja nio kpee kehm yele ekulugbe, akehng ekon jolo o ndi.

²⁶ Eji bo yele ekulugbe nti, bo nyehne akehng ekon kp'fabe lohng, jol nnene behdem kak nnyo, tibre bo jo fahle nwongo nyio.

²⁷ Wo Jonatan tikem wuk bade nwongo nyi nde ma gbaange ane, owo á kehm lohko esi ehti bi á fili go ege ebo go akpake ekon, behde ebo ebe kak nnyo, amahr soro bang-e.

²⁸ Owo nne a nsoja awohng kehm-e tongo re, <<Nso ko nwongo nyi sahb t'tahne, gbaange ane rea, <<Nkuk li a nne no l'li nsol lela!> Owo wahnge ane ma gbo ewo a.>>

²⁹ Jonatan kehm bungu re, <<Nsoo ebseb mfem ka ejahbe, nyehn ana amahr ma-m bang eji n lahbe akehng ekon ntiil.

³⁰ Ji jol ga nob, li re ane li nsol nyi bo da lela goji anebekv ebo. Wob bum re elwulu ni e wulu anebe Filista jolem gbale sehnga?>>

³¹ Efung bio, eji anebe Isreel wulu anebe Filista homo go Mikmasi song rehng go Ajalon, bo l'lahng.

³² Bo b'be a nsol nyi bo da no, bo rodo ejoro, adahmagbudu, a efong song wul, bo jo li, a alung alung.>>

³³ Nne kehm tongo Sol re, <<Nyehn ana ane baa kp'limi abiafem tob Jehova, eji bo kp'lehke nnyam alung alung.

Sol kehm tongo bo re, <<Eltaame enahne ebgo. Banngen eltal ni nnen bulu a tvtv.>>

³⁴ Á kehm bungu re, <<Songen go ellong ane bao wahn song tong bo re, 'No nne ko edahmagbudu a njoro, wahn ba wul bo a, fere li bo. Kana kpe lim abiafem tob Jehova jo li nnyam alung alung.>> Owo nne awohng awohng kehm koko nfong atv mao, song wul-e o.

³⁵ Owo Sol soro lim egudu njom ka Jehova. A wo li ngbokambang egudu njom ji á lange no.

³⁶ Sol kehm tongo re, <<Nong wahr tahmen song kam anebe Filista atv maa, fere da nsol ebo tete efungfu se, wahr k'yake nne awohng sa go elkpin.

Bo faang-e re,<<Lim ana fuum-a no.>>

Wo nlimanjom bungu re, <<Nong wahr tohko seb kahn goji Esowo a.>>

³⁷ Ano wo Sol bahbe Esowo, <<Me n song kam toono anebe Filistaa? A bahke yake bo kak anebe Isreel go eboa?>> Wo Esowo we-e faangem efung bio.

³⁸ Sol kehm bungu re, <<Baan a, wahn atubesi nsoja kpee, wahr seben kahn, abiafem nya bo ma lim a lela.

³⁹ Etingitingi ana Jehova ji foro anebe Isreel yake li go elkpin, afi eb'bi jio li a Jonatan mmon ewame, á bahke tiki kpo.>> Jol nne na awohng ellum bungem.

⁴⁰ Sol kehm tongo anebe Isreel kpee re, <<Wahn yiimen go, me a Jonatan mmon ewame, e bahke yiimi ga. Bo faang-e re,

<<Lim ana fuum-a no.>>

⁴¹ Owo Sol kehm kake ero ka Jehova, Esowo bi anebe Isreel. Jenji wahng ka a ki faange nlokeltum ewa lela? L'jol re ebi li ka me, afii Jonatan mmon ewame, faange go elfaange atubu ni bo kpo lung re Urim, wo l'fere jol re ebi ji aneblum Isreel ji, tob faange go elfaange ni bo kpo lung re Tumim.>> Jonatan abola Sol bo ba elfaange gbo tub bo, aneblum f'for lohng go elfaange nio.

⁴² Sol bungu re, <<Tuben elfaange nia ka me a Jonatan mmon ewame, elfaange nia gbo tub Jonatan.

⁴³ Owo Sol kehm tongo Jonatan re, <<Tong-m ejum ji a ma lim.>> Jonatan tong-e tong re, <<N wuungu abon akehng ekon, go egame esi ehti. Wo anv m bahke kpoko!>>

⁴⁴ Sol re, <<Nong Esowo bib aname, sahb b'bib, wo Jonatan a tohko kpo.>>

⁴⁵ Wo aneblum kehm tongo Sol re, <<Jonatan kpoa, ye ji ma ko egburu elforo nia ba ka anebe Isreela? Nehm jol ano! Etingitingi, ana Jehova li go elkpin, jol ellv esi ene nehm gbo ndi, á limi jia lela tib ekakebo ji Esowo. go mbang nyia aneblum bao tahre Jonatan, bo we-e wulem.

⁴⁶ Owo Sol kehm rahke anebe Filista go elkame, bo fere feere ga eboa ndi.

⁴⁷ Eji Sol ba jol ntul no Isreel, á jo noko a anebekv ebo ejang abehng abehng: anebe Moab, anebe Amon, anebe Edom, atul ba Joba, a anebe Filista. Ejang abehng abehng bi á sennge feere, á jo nohko bo fere kak bo erem.

⁴⁸ Á jo noko sahb t'tahne ga anebe Amalek, tahre anebe Isreel yehke go abo ane ba jo da nsol ebo.

Ebangenahb ji Sol

⁴⁹ Abon ba Sol ba nlum ba a, Jonatan, Isivi a Malki-Sua. Mbing nyi mmon ewe no nkal, no jolo no nkul bo jo lung-e re, Merab, mmon no nse bo jo lung-e Mikal.

⁵⁰ Mbing nyi nkal ewe bo jo lung-e re, Ahinoam mmon no nkal no Ahimasi. Mbing nyi ntubesi nnea nsoja ewe bo jo lung-e re Abner mmon no nlum no Ner, Ner jolo mmonannyeahn ndea Sol.

⁵¹ Ndea Sol Kisi, a ndea Abner Ner, bo ba jolo abon ba nlum ba Abiel.

⁵² Afung kpee nya Sol jolo no, ebta jo sumu sehng a anebe Filista ngare anyehng anyehng nyi á l'nyehn etahntahn nne, afii nne no kpi esahb, á jo ko-e kak ege eltum.

15

Jehova Tene Sol Ana Ntul

¹ Samuel kehm bungu tong Sol re, <<Me wo li nne no Jehova tumu re me n ba kak-a akehng go esi wo jol ntul ka ane ebe Isreel; Anv, wuungu atung go etib bi lohng goji Jehova.

² Ji ji a ji Jehova ji Kp'fili Elbung a Ndi kp'bungu: <M bahke kake anebe Amalek erem go ejum ji bo limi anebe Isreel, eji bo biiri sik bo go mbang, eji bo lohngo go Ijib jo tahm.

³ Anv song wo song nok a anebe Amalek, ran-nge ejum ajehng ajehng ji li ka bo kpee. Ka yake bo, wul aneblum, a anebkal, a abonse, a abonbili, adahmagbudu a ejoro, akamel a ebvankang.>>

⁴ Owo Sol kehm lungu aneblum, bo ba kono, fere fange bo go Telem- nsoja nyi jo jen akpade jolo ane atahl alon alon nkpel tahltahl nkpel elon, (200,000) ane atahl alon alon nkpel atahl alon, (10,000) nyi lohngo Juda.

⁵ Sol kehm tahme go ejahbe anebe Amalek song biiri sik bo go edamme.

⁶ Owo á kehm tongo anebe Ken re, <<Lohngen song yaken anebe Amalek eji n l'ki-n tob ranngesemme a bo, tibre á tibi anebe Isreel nnoobo eljini eji bo lohngo go Ijib jo ba.>> Ano wo anebe Ken kehm tahme lohng anebe Amalek sa.

⁷ Sol kehm noko ebta a anebe Amalek ga bo, bomo go Havila tete rehng go Sur, kohlo nkonandi ero nfam nyi Ijib.

⁸ Á bobo Agag ntul no anebe Amalek mbir mbir kehng a ne, á wulu ane ebe kpee go ekahngkahng.

⁹ Wo Sol a nsoja enye wulem Agag a ejoro bi nno, a adahmagbudu, agburu efong, a abonjoro, ejum ajehng ajehng ji jolo ji nno. Nyaa joom kor bo re bo ranngesemme, wo ejum ajehng ajehng ji bo ma ten, a nya li lenge lenge, bo ranngesemme.

¹⁰ Owo Jehova kehm bungu tong Samuel re:

11 Me n gbo ntir re n tohko na bob Sol etul, tibre á ma-m senng'e njahm, á limem ana n tib-e no,<< Samuel bele erakatahng, á lingi tob Jehova atv mao kpee.

12 Efungfu behre behre Samuel kehm lohngo tahm re á song kpiri Sol, wo bo tong-e re, <<Sol ebtahm go ejahbe Kamel. Yebmong ejum bum elne ji bo bahke jo buum-e, fere soro o tahm go Gilgal.

13 Eji Samuel kpir-e no, Sol bungu re, <<Jehova fuul-a! Me n lim nsol nyi Jehova tongo no.>>

14 Wo Samuel re, <<Jenji wahng'e n kp'wuku ebiingi ejoro go egame atung?>> fere wuk ebiingi adahmagbudu?

15 Sol faange re, <<Nsoja nyi ko bo goji anebe Amalek, bo yake atingi ejoro, a adahmagbudu re bo ko ba lim njom ka Jehova Esowo ebahne, wo nsol nyehko e ranng'e kpee.>>

16 Samuel kehm tongo Sol re, <<Ebgbal! nong me tong-a ji Jehova bungu no tong-m nyaane atv.>>

Sol kehm faange re, <<Tong-m me.>>

17 Samuel re, <<Jol tvtv o, eji a jolo nne no kp'seke ega esamahr, anv wo sang ma jol ntubesi go at'tohngo nya anebe Isreela? Jehova kak-a akehng go esi re wo jol ntul ka anebe Isreel.

18 Á fere tum-a eltum re, <Song, wo song ranng'e anebe Amalek, aneb eblum bao, nok ebta a bo tete wo nyehn re wob feenge bo kpee yehke.

19 Jenji wahng'e a ki kpunu ji Jehova bungu no? Jenji wahng'e a song da nsol fere lim ab'bi go esamahr bi Jehova?

²⁰ Sol re, <<N w'wuk Jehova, n j'je eltum ni Jehova tum-m no, n l'lohko ranng'e anebe Amalek, n ko Agag ntula bo kehng'e a ne.

²¹ Nsoja daa ejoro, a adahmagbudu, atingi nya bo yehke no ka Esowo, eji bo l'ko ba lim njom ka Jehova Esowo eba go Gilgal.

²² Wo Samuel faange re, <<Wo kp'tiri re Jehova kpo bel eyebatahng go njom nyi eljahme fia a ajomjom yako, sehng'e re nne kak Jehovaha? Etingitingi, ekake nne ji ga gbal sehng'e njom alimi, ewuku nne gbale sehng'e afom ekom.

²³ Tibre abiafem nya a kp'noko a Jehova li ana aje alimi, elkuudu li ana abiafem eblom ajomo, tib eji a ma ten ellum ni Jehova, á ma-a tob ten ana ntul.>>

²⁴ Owo Sol kehm tongo Samuel re, <<Me n lim abiafem. Me n daange ntahm nyi Jehova a elle ena. N jo f'fahl aneblum bao, owo wahng'e n limi ji bo tong-m no.

²⁵ Anv, n kp-a gboongo, tahm ka-m egame abiafem, wo fere ba toon-m, eji n l'song kak Jehova.>>

²⁶ Wo Samuel tong-e re, <<N nehm feere ba toon-a, wob ten ellum ni Jehova, Jehova ma-a tob ten ana ntul no anebe Isreel.>>

²⁷ Ana Samuel senng'e re á tahm, Sol soro jabbe es'sili ekpawobo eje, soro yare.

²⁸ Samuel kehm-e tongo re, <<Jehova ebyare etul bi Isreel go ega lela, yebrod ka nnebjing ewa no nobo sehng'e wo.

²⁹ Go nsol kpee ye wo li ellub ni anebe Isreel, efahng'e á kpehme kim, afi yaange ntir enye, tibre ye nne sang no bahke yaange ntir enye.>>

³⁰ Sol kehm faange re, <<Me n lim abiafem. Titi kpun-m go esamahr anebkul ane ebame, a anebe Isreel, feere toon-m ba eji n l'song kak Jehova ye ji li Esowo eba.>>

³¹ Owo Samuel kehm feere toono Sol, Sol song kak Jehova.

³² Samuel kehm bungu re, <<Koon Agag ntul no anebe Amalek ba ka-m, Agag lohngo ba agbekobo go ebo. Á tiri re elmaange ni elkv ebsehng.>>

³³ Wo Samuel bungu rea, <<Ana ekahngkahng eba ma lim anebkal ki kpe kpi abon, ano wo nne no wa, bahke tob sa abon go ellong anebkal.>> Samuel wulu Agag go esamahr bi Jehova go Gilgal.

³⁴ Samuel mehl tahm go Rama, wo Sol mehle eje kehng go ege etahk go Gibeá ejahbe eje.

³⁵ Tete efung bi Samuel kpo no, á kpeem tiki je song nyehn Sol, jol tvtv o Samuel jo lingi Sol gbalee. Jehova gbo ntir re á jolem limi Sol jol ntul no anebe Isreel.

16

Samuel kake Devid Akehng Go Esi Bob-e etul

¹ Jehova kehm tongo Samuel re, <<Bahke kange renan ji a bahke lingi Sol, eji m me-e ten re á k'kpe jol ntul no anebe Isreel? Kak akehng rur go ega ntang, wo mehl song, m bahk-a tumu tv Jese ji Betlehem, me n yehke mmon ewe awohng no nlum re á jol ntul.>>

² Wo Samuel kehm bungu re, <<M bahke jeke renan? Sol l'fere wuk bade ejum jia, á bahk-m wulu.>>

Jehova kehm bungu re, <<Rod mmona nfong no nkal tahm a ne, wo bung re, <M ba re me m ba lim njom ka Jehova.>

³ Tong Jese á tob ba go njom alimi nyio, m bahk-a tibi ji a bahke limi. A bahke kake nne no n l'tib-a akehng go esi bob-e etul ka me.>>

⁴ Samuel limi ana Jehova bungu no. Eji á rehng go Betlehem, anebkul nfam akahb kahme bo eji bo ba kpir-e. Bo kehm bahbe re, <<A ba go elkoona?>>

⁵ Samuel kehm faange re, <<Ee, go elkoono wo m ba no. M ba re me m ba lim njom ka Jehova. Yaben elnahne bum ejahne ejahne, wahn toon-m ba go njom alimi.>> Á kehm yabe Jese a abon ebe ba nlum, bum ebo ebo, fere tiingi bo re bo je njom alimi.

⁶ Bo rehng kan a me, Samuel nyehne Eliab, á kehm tiri re, <<Etingitingi, Á wo li etingi nne no Jehova me-e kak akehng go esi, ma ba yiimi a, go esamahr bi Jehova.>>

⁷ Wo Jehova tongo Samuel re, <<Ka tiiri bade elbohngo ene, afi agbal ero enye, tibre ye m me-e ten. Jehova kpehme seenge nsol ana ane kpo seenge. Ane kpo seenge go elbohngo ni alatahk, wo Jehova kpo seenge go eltim.>>

⁸ Owo Jese kehm lungu Abinadab, tong-e re á sehng go mbuksong mi Samuel, wo Samuel bungu re, <<Jol noa, Jehova we-e ka yehke.>>

⁹ Jese limi re Sama tob ba sehng, wo Samuel bungu re, <<Jol ye Jehova we-e yehkem.>>

¹⁰ Jese limi ano ano abon ebe ba nlum na asehma, bo sehng go esamahr bi Samuel, wo

Samuel kehm-e tongo re, <<Jehova ka yehke nne awohng awohng go ebo ellong.>>

¹¹ Owo á bahbe Jese re, <<A wo li abon ba nlum ba a kpi no kpeea?>>

Jese kehm faange re, <<Ebsa mmonkahla, á kpi ejoro kpur.>>

Samuel re, <<Tumen tv-e, wahr nehm tiki ji ndi tete á ba rehng a.>>

¹² Owo á kehm tumu bo song ko Jese ba a ne. Á jolo biki biki fere bel elbohngo ni nno, á gbo ejangkun. Jehova kehm bungu re, <<Nne noo wo a, mehl wo kak-e akehng go esi.>>

¹³ Owo Samuel kehm rodo ntang yaange akehng kak-e go esi go esamahr abonanyehn ba nlum. Bomo efung bio asongo etohko ji Jehova kehm bake goji Devid a nsahm a nsahm. Samuel soro mehl tahm go Rama.

Devid jo loko Sol

¹⁴ Ngare nyia Etohko ji Jehova ebyake Sol abo, ebi etohko ji lohng goji Jehova ji kpo gbiing-e.

¹⁵ Alokeltum ba Sol kehm tongo Sol re, <<Nyehn ana ebi etohko ma lohng goji Esowo ba kehm-a elgbiingi.

¹⁶ Nong nsoo ewahre tong alokeltum ebe bo seb nne no bahke ma kub egehmegehme. Á bahke jo kub ngare nyi ebi etohko l'lohng goji Esowo ba a na, bahk-a tele.>>

¹⁷ Owo Sol kehm tongo alokeltum ebe re, <<Seben nne no kpo mal elkubu egehmegehme, wahn ko-e ba ka-m.

¹⁸ Nlokeltum awohng go ellong abalokeltum kehm faange re, <<Me n nyehn mmon no nlum

no Jese ji Betlehem, ye ji kp'kahne ana bo kpo kub egehmegehme nobnob. Á li nne no kpi etahne eltim, a li ntakuru. Á kpo bung nobnob, á li nne no gbo ejangkun. Jehova li a ne.>>

¹⁹ Owo Sol kehm tumu atiingi etib tv Jese fere bung re, <<Tum Devid mmon ewa no nlum tv-m, ye ji kpo kpur ejoro.

²⁰ Owo Jese kehm rodo mbvankang, gbad-e nsol alehke, a eyahbmahm ji bo ko ngunyam lim, ji amahm ma rur, a mmombul baange, kehm tumu bo a Devid mmon ewe no nlum tv Sol.

²¹ Devid kehm bake goji Sol, ba jol nlokeltum ewe. Á jo koro Sol s'sehng. Devid woomo go ellong ane ba jo fili nsol ebta enye.

²² Owo Sol kehm tumu ellum tv Jese re, <<Yake Devid, á samme sa jo lim eltum aname, tibre á ma-m kor s'sehng.>>

²³ Ngare anyehng anyehng nyi ebi etohko l'lohng goji Esowo ba yel Sol, Devid bahke rodo egehmegehme soro kehme elkubu, Sol bahke naange, fere jol nobnob, ebi etohko bahk-e yake.

17

Golaya so nsoja Isreel ebo go nnyo

¹ Ngare nyia anebe Filista lungu nsoja ebo ba kono go Soko ji Juda re bo nok ebta. Bo bumu ebud nsoja ebo go Efesi Damim go elka elka ni Soko a Ajeka.

² Sol a anebe Isreel kono fere bum ebud nsoja ebo go edamme ji Ela, jo toobo elbo re bo song nok a anebe Filista.

³ Anebe Filista kuumu ewong ajehng, anebe Isreel kuumu ajehko, edamme jol bo elka elka.

⁴ Ntubesi ebta, mbing enye bo jo lung-e re Golaya, á lohng go Gati, kehm lohngo go ebud nsoja ji anebe Filista ba yiimi. Elkul ero ene, a labe rehng ntahme elon, fere j'jok.

⁵ Á konngo ekpasi ebilekpi go esi, á kake ewobo ebta ji bo ko ebilekpi lim, kp'lubu rehng esikel atahltahl nkpel ewubbal atahl awubu, (57kilo-gram)

⁶ go ege akpade á kpennge ebilekpi, fvfo go njahm á leenge elkong ebilekpi.

⁷ Ebti bi elkong ene jolo ana ehti ntubansol, esi elkong bahke rehng <<esikel>> atahltahl atahl awubu nne l'dumu. (7 kilogram) Nne no jo fili ekum ebe gbo-e mbang.

⁸ Golaya yiimi jo rabe tob atubesi nsoja nyi anebe Isreel re, <<Jenji wahngé n lohngo ba noongo ebta? Me n nne Filista sanga, wahn alokeltum ba Sol sanga? Yehken nne á ba kpir-m ga edamme ba nok aname.>>

⁹ Á l'fere mal nok wul-m, wahr bahke fere woom-n go elwo, wo me n l'nok sehng-e fere wul-e, wahn bahke fere woom-r go elwo fere jo lok-r.>>

¹⁰ Nne Filista noo jo bungu re, <<Lela me n rede nsoja nyi anebe Isreel, ka-m wahn nnenlum awohng wahr nok atemtem.>>

¹¹ Eji Sol a anebe Isreel kpée jo wuk ana nnea Filista jo bung alum nyaa, eko jo tane bo, bo jo kahme na kahm.

David wulu Golaya

¹² Devid jolo mmona nnenlum no bo jo lung-e re Jese ji lohng go Efrat go Betlehem ji Juda. Jese bele abon ba nlum na anehkeni, ngare nyio nyi Sol, Jese ebsahb k'kul.

¹³ Abon ebe ba nlum na era toono Sol je ebta: Ngbokambang bo jo lung-e re Eliab; etoono Abinadab, etoono ane ara Sama.

¹⁴ Devid wo jolo nkalla. Ara baa ba nkul jo toono Sol,

¹⁵ wo Devid jo lohngo etahk Sol jo song kpur ejoro nde go Betlehem.

¹⁶ Go nfung atahl abal nyi nnea Filista noa jo lohng ba yiimi, efungfu a elgung.

¹⁷ Efung abehng Jese kehm tongo Devid mmon ewe no nlum re, <<Rod nsahke nyia, a awokowoko nkohl, nya nne l'dumu bahke rehng e kilogram ebwubu wo foomo song ka abonane go ebud nsoja.

¹⁸ Tob ko alahbbel nfong ma bo ma ban wum, ebahk ebwubu wo ka ntubesi no ellong ebo. Nyehn abonane ana bo li no, wo feere ba tong-m.

¹⁹ Bo li a Sol, a aneblum Isreel kpee go edamme ji Ela kp'noko a anebe Filista.>>

²⁰ Efungfu behre behre Devid yake ejoro ka mb'baabe, kpu nsol gbade mehl asongo ana Jese nde tong-e no. Á rehng go ebud nsoja eji nsoja kp'lohngo tahm edi ji ebta li no, bo kp'biiki ebiiki ebta.

²¹ Anebe Isreel a anebe Filista kp'jeere ebo ebta kabbe atem.

²² Devid yake nsol enye ka nne no kpo kpur nsol, be song rehng go edi ji ebta fi no re á song

bahb ana abonanyehn li no.

²³ Eji á jo bung a bo, Golaya ntubesi ebta no anebe Filista, ye ji lohng go Gad, kehm lohngo yiimi go mbuksong ebta nyi anebe Filista, kehm kehme elrabe, Devid kehm wuku.

²⁴ Ngare anyehng anyehng nyi anebe Isreel l'nyehn nnenlum noa, bo kpee jo be a egburu elfahle.

²⁵ Anebe Isreel jo bungu re, <<N' kp'nyehne ana nnenlum noa kpo kono ellohngo ba, jo ba rede anebe Isreel. Ntul n Israel bahke kake nne no l'wul nnenlum noa agburu afang, fere ka-e mmon ewe no nkal, á ko-e go elbal, tob yehke nnahb enye bo nehm kpe jo tahb etak go Isreel.>>

²⁶ Devid kehm bahbe ane ba yiimi kohl-e re, <<Jenji bahke jolo ka nne no l'wul nnenlum noa, fere yehke esono jia go esamahr anebe Isreel? Ye elkohn nnea Filista awoo no kala yehke na nrur, bahke jo ba nyok nsoja nyi Esowo bi li go elkpin?

²⁷ Bo kpe tooro tong-e ana bo kp'bungu, <<Jia ji bo bahke limi ka nne no wulu nnenlum noo.>>

²⁸ Eji Eliab ji jolo mmonannyehn no Devid wuku ana á kp'bungu a aneblum bao, atahng rake tob Devid , á kehm bahbe re, <<Jenji wahnge a ba a? Nne awoo a tahme abonjoro bao sa-e go elka emahng? N kp'kahne elkohn elgeere ni a kpi no, ana eltim ena li eblum eblum, a ba re wo ba nyehn ana ebta li no.>>

²⁹ Devid kehm bungu re, <<Anv, me n lim jen? N nehm ma bung elluma?>>

³⁰ Á kpe sehng song bahb ane bandiki ejum j'nehm, aneblum bao kp-e faange ejum j'nehm.

³¹ Ane kehm wuku ji Devid jo bung, bo k'ko song tong Sol, Sol kehm tumu re bo lung Devid tv-e.

³² Devid bungu tong Sol re, <<Nnene eltim ki-e gbehke tib elbungu ni nnea Filista noa. Me, nlokeltum ewa bahke song nok a ne.>>

³³ Sol faange re, <<Wo nehm ma lohng song nok a nnea Filista, wo mmonjangkun wo, yeb jol ntakuru nnoko ebta bomo eji á li njangkun.>>

³⁴ Wo Devid tongo Sol re, <<Me nlokeltum ewa jo kpuru ejoro nsoo, ngbe afii ebea lohngo ba, ba bob njoro go ebo ellong,

³⁵ n kame toon-e song rum-e, fere tahre njoro nyio yehke go ege a nnyo, á l'senngé toon-m n jo bob-e ege anyar fere wul-e.

³⁶ Me nlokeltum ewa me n wul ngbe a ebea, nnea Filista noa, ye ji ki yehke nrur bahke jolo ana enyam bio, tibre yeb nyok nsoja nyi Esowo bi li go elkpín.

³⁷ Jehova ji kpo tahr-m yehke go akpade ngbe a akpade ebea, bahk-m tahre yehke go ebo nnea Filista noa. Sol kehm tongo Devid re song, Jehova jol a na.

³⁸ Owo Sol kehm liibi Devid eblahme ebta ebe, á kak-e ewobo ebta fere konng-e ekpasi ebilekpi go ege esi.

³⁹ Devid kehm gbade ekahngkahng bi Sol, go ekpawobo ji á kake no, gaare eljene yannge o, tibre ye kpehme kono elkake nyao.

Á kehm tongo Sol re, <<N nehm ma je a nsol nyiao, tibre me-e ka kpuuru. Owo á kehm yehke.>>

⁴⁰ Owo á kehm rodo ebti ebe fili, á jake afeele atal na alon, go ebgba kak go ege ebam ji á kpo leenge jo kpur ebul, fere fili egbasad go ebo kabbe nnea Filista.

⁴¹ Wo ga nnea Filista a nne no jo fili ekum ebe go egea mbuksong kp' jeere kabbe Devid

⁴² Á seenge Devid too, fere nyehn re, Devid se sehng, mmonse no nlum, a gbo ejangkun fere n'nob, Golaya Devid we foongem ejumjum go ege amahr.

⁴³ Á kehm tongo Devid re, <<Me mbv nyia, ji wahnge á kp'bake egame a ebtia?>> Nnea Filista noa su Devid bade asowo enye.

⁴⁴ Á bungu re, <<Ba a, m bahke yare ngubjing enya ka nruk a enyamkulugbe bo li!>>

⁴⁵ Devid bungu tong nnea Filista re, <<Á kp'bake ga egame a ekahngkahng, go elkong, budu molkong no nse, wo me n kp'bake go ega go mbing nyi Jehova ji kp'fili Elbung abola Ndi , Esowo bi nsoja nyi anebe Isreel, ye ji á kp-e rede.

⁴⁶ Lela Jehova bahk-a jabbe kak-m go abo, m bahk-a rumu tub ndi fere kim-a esi. Lela jia, ngubjing enyahne wahn nsoja nyi anebe Filista, m bahke kake nruk a enyam ekulugbe, njini kpee bahke kahne re, Esowo bia go Isreel.

⁴⁷ Bo jio kpee ji ma rur a, bahke kahne re, go ekahngkahng, a elkong sang Jehova kpo tahre, ebta bi Jehova bi, á bahk-r kake wahn kpee egahre abo.

⁴⁸ Ana nnea Filista jo jeere kohl-e re á nok a ne, Devid soro be elware asongo go mbuksong ebta re á song kpir-e.

49 Á Lohko ebo go ege eham, yehke eltal kehm mahde tub nnea Filista go ege a mbuk. Eltal nio yel-e go mbuk, á gbo koongo esamahr go ndi.

50 Go mbang ana nyia wo Devid ko egbasad a eltal ga nnea Filista, eji á sade wul-e, jol ekahngkahng á filem.

51 Devid kehm beke song wahr kuum-e, song jabbe ekahngkahng ebe, tohng wob go mbak eji á me-e wul, á kim-e esi go ekahngkahng.

Eji anebe Filista nyehne re, ntubesi ebo ebkpo, bo soro senngbe be.

52 Owo nsoja nyi Isreel, a nyi Juda kehm soro be asongo jo rabe, kam anebe Filista tete song rehng edi elyele ji Gad a eti mbu ji Ekron. Akvne jo noongo mbang mbang nyi Saaram tete rehng Gad a Ekron.

53 Eji anebe Isreel jo feere kehngbe go elkame ni bo kame anebe Filista, bo ba da nsol go ebud nsoja.

54 Devid koo esi nnea Filista noo ba a ji go Jeusalem, nsol ebta nyi nnea Filista, á song kake go ege etahk.

55 Eji Sol jo baabe Devid eji á lohngo re a song kpiri nnea Filista, a tongo Abner ji jolo ntubesi a nsoja re, Abner nne awoo li nde mmonjangkun noo?

Abner faange re, <<Etingitingi ana wo li go elkpin, nsoo ntul, me n nehme kahn.>>

56 Ntul bungu re, <<Seb kahn nne no li nde mmonjangkun noa.>>

57 Ana Devid kehngbe no eji á song wul nnea Filista, Abner soro ko-e ba a ne goji Sol, Devid kpeka kpi esi nnea Filista go ebo.

⁵⁸ Sol kehm-e bahbe re, <<Wo mmon a nyehne, njangkun?>>

Devid re, <<Me mmon no nlum no nlokeltum ewa, Jese ji lohng go Betlehem.>>

18

Sol Bele eteela ala Bada Devid

¹ Eji Devid ma bung a Sol mal, Jonatan ba jolo ajehng go etohko abola Devid, Devid jo kor-e ana ebjing ebe antahng.

² Bomo efung bio Sol bumu Devid re á jol a ne, á kpeem taame re Devid feere song go etahk nde.

³ Jonatan bo gbanngge alung abola Devid, tibre á jo kor-e ana ebjing ebe.

⁴ Jonatan yehke ekpawobo eje ji á kake no feere aji ka Devid, a ewobo ebta, go ekahngkahng ebe, elban ene, a atake elban.

⁵ Eltum anehng anehng ni Sol tumu Devid, Devid jo limi go nseenga nseenge, wahng ka Sol ka Devid nji nyi kp'wahre go nsoja. Jia koro nlong nsoja kpee, a atubesi abalimeltum ba Sol fvfo.

⁶ Eji nsoja jo feere kehngge eji Devid wulu nnea Filista, anebkal kehm lohngo go ajahbe Isreel kpee re bo song wane ntula Sol, bo jo yimi ase fere jo bahn, bo jo yimi ase eyebatahng jo kub atalehk a agehmegehme.

⁷ Ana bo jo bahn, bo jo yimi re, <<Sol ebwul ane atahltahl ba be, Devid ebwul ane atahla nku a nkuu ba be.>>

⁸ Sol atahng rak-e sehng, eltim we yebem tib go elkohn elbungu nia, á tiri re, bob ka Devid nfange nyi kp'wahre, ane atahla nku a nku, wo

me atahltahl nya nya. Jenji á bahke kpe bel, k'sehnge eti etul?

⁹ Bomo ngare nyio asongo, Sol kehme Devid amahr kunu.

¹⁰ Njahm efungfu nyehko, ebi etohko kehm lohngo goji Esowo eko eko ba yel Sol. Á kehme amahr nyehn go ege etahk. Devid jo kubu egehmegehme ana á jo kono ellimi, ngare nyi ejum jio l'ba a ne. kehm rodo egehmegehme jo kub ana á jo kono ellimi. Sol fili elkong go ege ebo.

¹¹ Á ro elkong nio tv Devid, tibre á tiri re m bahk-e jahme bade ekahme, <<M bahke jahme Devid bade ekahme.>> Wo Devid fehme nkpel ebal.

¹² Sol kehme Devid fahl, tibre Jehova jolo a Devid, wo yeb yake Sol.

¹³ Owo á kehm tumu Devid fere ka-e nsahm re á jol ntubesia nsoja atahltahl nkpel ebal atahlawubu. Devid rod nsoja nyio lohng a bo tahm edi emahng ebta ebo.

¹⁴ Go ejum ajehng ajehng ji Devid jo lim jo n'nob a ne, tibre Jehova jolo a ne.

¹⁵ Eji Sol jo nyehne re Devid nsol jo n'nob a ne, á jo fahl-e fahl.

¹⁶ Wo ane kpee ba Isreel, a ba Juda Devid jo koro bo sehng, tibre Devid jo ko bo song rehng ebo emahng ebta.

¹⁷ Sol kehm tongo Devid re, <<Nyehn mmon ewame no nkal no nkul Merab, m bahk-a kake ye, a ko-e go elbal, lub lok-m esahb esahb, wo nok ebta bi Jehova.>> Wo Sol bungu tong elne re, <<N

nehm kpe tiki tab ebo kun-e, nong anebe Filista lim-e go!>>

¹⁸ Wo Devid tongo Sol re, <<Me elkohn nne awoo, nnahb enyame li jen, afii ejahbe ejame li jen go Isreel ji bahke wahnge me n jol nnara ntul?>>

¹⁹ Owo eji ngare rehng no nyi Merab mmon no nkal no Sol, nyi jolo re bo ka-e Devid á jol nkal ewe, bo fere rod Merab ka Andril ji lohng go Mehola.

²⁰ Mmona Sol no nkal Mikal bo jolo go elkoro abola Devid eji bo tongo Sol, Sol kor-e kor.

²¹ Á tiri ano re, <<M bahk-e kake ye, eji á l' jol esi eti mbang ka-e eji ebo bi anebe Filista l'kuum-e.>> Owo Sol kehm tongo Devid re, <<Anv wobbel etoono eyake re wo jol nnar ewame.

²² Owo Sol kehm kake anebe etahk ebe nsahm re, Bungen a Devid mbehr mbehr re, <<Nyehn me, ntul a kp-e koro, ane ebe kpee a kp'tob kor bo, nobo re wo jol nnar ewe.>>>

²³ Bo jo tongo Devid alum nyaa nkpela nkpele. Wo Devid bungu re, <<Wahn kp'tiri re ejum ji nse jia, re nne jol nnara ntula? Me ga, nkpak nyi, bo me-e nehme ga kahn.>>

²⁴ Eji alokeltum Sol tong-e ji Devid ma bung,

²⁵ Sol faange re, <<Tongen Devid re, 'Ntul nehme seb ekun elaame abehng abehng, sehng re bo wul anebe Filista, kiimi bo adokodoko, atahl alon bongo anebekv ebe.>> Ntoobo nyi Sol jolo re, eji Devid l'gbo yel ebo anebe Filista bo wul-e.

²⁶ Eji abalimeltum Sol, song tong Devid ejum jia, kor-e kor re á jol nnara ntul. Eji afung elbal nya bo kake no l'k'sehng,

²⁷ Devid kehm rodo nsoja enye, bo tahm ebta song wul anebe Filista atahl awubu fere kiimi bo adokodoko ba anya. Bo fange nfange nyio jang jang tib ntul, eji Devid l'jol nnara ntul. Owo Sol kehm yake mmon ewe no nkal Mikel re bo jol elbal.

²⁸ Eji Sol sebe kahn re Jehova li a Devid, mmon ewe no nkal Mikal Devid kpe-e koro,

²⁹ Sol jo kpe fahl na Devid budu, á sa jol nne ekv no Devid tete afung enye nya á jolo go elkpín.

³⁰ Atubesi nsoja ba anebe Filista soro asi jo lohng tahm ebta, ngare anyehng anyehng nyi bo l'lim ano, jo tiki nob a Devid, sehng atubesi nsoja bako kpee ba Sol, fvfo mbing nyi Devid kpe lohng egburu elgham.

19

Sol gaare re á wul Devid

¹ Sol tongo Jonatan mmon ewe no nlum a anebe etahk ebe kpee re, bo wul Devid. Wo Jonatan ga Devid jo kor-e sehng.

² Jonatan sahb r'rehke Devid re, <<Nsoo ewame Sol kp'sebe mbang nyi á bahk-a wulu, baabe elna behna efungfu seb edi wo song biiri sa o.

³ M bahke jeke ekulugbe song yiimi bung a nsoo, edi ji a behr no, m bahke bungu nobnob bade a na, m bahke ba tong-a n l'seb kahn.>>

⁴ Jonatan bungu nobnob bada Devid tong nde Sol re, <<Nong ntul k'lim ebi a nlokeltum ewe Devid, á wa-a ka soodo, ji ye ma lim ma-a ka egburu elgham.

⁵ Á fili elkpín ene go ege ebo, eji á wulu nnea Filista. Toono o Jehova ka anebe Isreel kpee egburu esehngebta, fvfo a ny'nyehn fere bel eyebatahng. Jenji wahnge anv a yahke lim ebi tob nnea mbol mbol, eji a yahke wul Devid mbol mbol?>>

⁶ Sol wuungu Jonatan atung, fere ko nwongo nyia re, <<Etingitingi ana Jehova li go elkpín Devid bo we-e nehm wul.

⁷ Owo Jonatan kehm lungu Devid fere tub-e eka jia. Á ko-e ba a ne goji Sol, Devid fere jol a Sol ana wuku wuku.

⁸ Ngare anyehng ebta kehm kpe gbo, Devid l'lohng song nok a anebe Filista. Á noko a bo t'tahne wul bo, egom jehko be.

⁹ Wo ebi etohko lohngo goji Jehova ba yel Sol, eji á jehk no ege ekp'kpa fili elkong ege ebo. Ana Devid jo kub egehmegehme,

¹⁰ Sol gaare re á jahm-e elkong ene bade go ekahme, wo Devid fehme, eji Sol ro elkong sehng song jahm yel ekahme. Atv mao Devid noko sehng be for.

¹¹ Sol tumu aneblum tv go etahk ji Devid re, bo song baabe eji bo l'wul Devid efungfu. Wo Mikal nkala Devid rehk-e re, <<a tohko be tahre elkpín ena atv maa, behna bo bahk-a wulu.>>

¹² Owo Mikal kehm yehke Devid yake go mmombu a nkpe ekahme, á be for.

¹³ Mikal kehm rodo elokelom bum edilnong, konngo mbomo fere kpu anyar mbul bul-e go esi.

¹⁴ Eji Sol tumu aneblum re bo ba bob Devid, Mikal tongo bo re, <<Á kp'yame.>>

15 Sol kpe tum aneblum re bo song nyehn Devid, á tongo bo re, <<Roden ye a edilnong edilnong ba a ne eji n l'wul-e.>>

16 Wo eji aneblum yele ekp'kpa, bo nyehne elokelom kun edilnong, go ege esi anyar mbul nya, bo nyehne no.

17 Sol kehm tongo Mikal re, <<Jenji wahnge a ma-m nehm ana me, yake nnekv ewame á be for?>>

Mikal tong-e re, <<Á tong-m re, Tob-m me m be for, tohko jol ano m bahk-a wulu.>>>

18 Eji Devid ma be for, á tahme goji Samuel go Rama, song tong-e nsol kpee nyi Sol me-e lim. Owo ye abola Samuel kehm tahme go Noati fere song sa o.

19 Ellum kehm song kpiri Sol re, Devid li go Naoti nyi Rama;>>

20 Owo á kehm tumu aneblum re bo song bob-e. Wo eji bo song nyehn ellong abanyehnamahr kpi amahr nyehn, Samuel yim o ana ntubesi abo, etohko ji Esowo kehm ba yel aneblum ba Sol tumu no, bo fvfo tob kehme amahr nyehn.

21 Sol bo song tong-e bade ano, á kpe tum aneblum bako, bo fvfo tob kehme amahr nyehn. Sol kpe bulu tum aneblum go nkpel era, bo fvfo tob song kehme amahr nyehn.

22 Es'kohro yefono tahme antahng go Rama sehng song rehng go egburu elbing alahb ni Seku. Song bahb re, <<Samuel abola Devid bo ba na?>>

Bo tong-e re, <<Bo li go Noati nyi Rama,>>

23 Owo Sol kehm tahme go Noati nyi Rama, Etohko ji Esowo tob ba a ne á jo jen yanng jo nyehn amahr tete á song rehng go Noati.

24 Á jaake ekpawobo eje, ye fvfo tob nyehn amahr go esamahr bi Samuel. Á noongo ebun ebun efung kohro kohro, atv kohro kohro. Owo wahnge ane bungu re, <<Sol fvfo tob wob go ellong abanyehnamahra?>>

20

Devid abola Jonatan

1 Owo Devid kehm beke Noati nyi Rama tahm goji Jonatan song bahb re, <<Fono me n lim jen? Jenji li ebi ejame? Mbang anyii m ma soodo nso, ji wahnge á kp'gaare re á wul-m?

2 Jonatan faange re, <<Kpak, a nehm kpo, nyehne, nsoo no ewame kpehme lim ejum ajehng ajehng ji nlen afii ji nse, ki-m lim me n kahn. Jenji wahnge á bahk-m behre ejum ana jia? Ano sanga!>>

3 Wo Devid ko nwongo bung re, <<Nso no ewa kp'sahb k'kahn nobnob re a kpi nnoobo eljini aname, yeb bung tong elne re, <Jonatan nehm tiki kahn jia, tohko jol ano bahk-e maange sehng.> Etingitingi ana Jehova li go elkpín, wo tob li go elkpín, me n nong na go emel elkv.

4 Jonatan kehm tongo Devid re, <<Ejum ajehng ajehng ji a l'seb re me n lim ka-a, m bahke limi ka-a.>>

5 Owo Devid kehm bungu re, <<Nyehne, behna wo li nnyahng nfenfe mi elkak alimi, jol fuumu re me n li nsol a ntul, wo nong me n song, song biiri go ekul tete elgung ni njahmfunfu nyehko.

6 L'jol re nso me-e nehm tiki nyehn, tong-e re Devid sahb gb'gboongo re me n yak-e á be je go

Betlehem go ege ejahbe, tibre nnahb enye kpee bahke limi njom nyi elya.

⁷ Á l'fere tong re <Ebnob sehng.> Eblohng re me nlokeltum ewa ebfor. Wo l'fere rak-e, a bahke kahne re á kp'lohko seb re á lim-m ejum.

⁸ Ana wofono antahng, tib me nlokeltum ewa nnoobo eljini, tibre wo wo ko-m ba, ba ko nwongo go esamahr bi Jehova. L'jol re me n li ebi wul-m antahng. Jenji wahnge a bahk-m yake ka nso.?

⁹ Jonatan re, <<Kpak. Lub li re me n wuk ejv bio re, nsoo no ewame kp'tiki seb re á lim-a ejum, kehn me wa-a nehm tong-a?>>

¹⁰ Devid kehm bahbe re, <<Nso l'faang-a egban egban, nne awoo bahk-e ba tong-m?>>

¹¹ Jonatan kehm bungu re, <<Ba wahr tahm go ekul, owo bo kehm toono ano tahm.>>

¹² Jonatan kehm tongo Devid re, <<Me n tir Jehova ye ji li Esowo bi anebe Isreel re, m bahke nyame nsoo, egolgol ji anv, njahm efungfu nyi behna. L'jol re á bahke bungu nobnob bade a na, m bahke tumu ellum tv-a lim-a a kahn.

¹³ Wo l'fere jol re nsoo kp'tiki seb re á lim-a ejum, nong Jehova bib aname, sahb s'sab, n tohk-a lim a kahn fere tum-a a song go eyebatahng. Nong Jehova jol a na ana á ma jol a nsoo.

¹⁴ Wo, tib-m nnobo eljini ni l'k'kane ana elkohn nnoobo eljini ni Jehova, ana me n li elkpín, eji bo l'ki-m wul.

¹⁵ Ka tiki yake nnoobo eljini ena, a nnahb enyame, jol afii fere jolo re Jehova ebwul nne awohng awohng no li nnekv no Devid go esamahr njini nyia.

16 Owo Jonatan kehm koko nwongo anebe etahk Devid bung re, <<Nong Jehova lung anebekv ba Devid elam.>>

17 Jonatan limi re Devid kpe tuungu riini aba go nwongo tib go elgoro ni á kpi a ne, tibre á jo kor-e ana yefono antahng.

18 Jonatan kehm tongo Devid re, <<Behna efung nnyahng nfenfe mi elkak, ane bahke jo bahb re Devid li gan? tibre eti eja bahke sake nnehme nehme.

19 Njahm fungfu yehko, ngare elgung, song go edi ji a biiri no ngare nyi ntong nyia bomo no, yiimi sik go eltal ni Ejel.

20 M bahke take ntake elban na era tv ejang bio, bahke jolo are n kp'take tv edi ji bo tibi no.

21 M bahke tumu mmon no nlum, fere tong-e re, <Song wo song seb atake elban nyao.> N l'fere tong-e re, <Nyhne, atake elban nyao li ejang bia, song ko ba,> Wo lohng ba, etingitingi ana Jehova li go elkpín, wobfor; efin abehng abehng limm.

22 Wo n l'fere tong mmon no nlum noo re, <<Nyhne, atake elban nyao ma-a siiri sa,>> A bahke songo, tibre Jehova ma-a tum re wo song.

23 Bade nwongo nyi li ka wo a me nyi e ma toobo, buumu re Jehova wo li ntianse enyahre tete go njinanjini.

24 Owo Devid kehm biiri go ekul, eji nnyahng nfenfe mi elkak ba no, ntul kehm jehke re á li nsol.

25 Á jii go edi ji á jo kono eljehke go nkpe ekahme wane a Jonatan. Abner jii kohlo Sol, wo eti ji Devid jolo nnehme nehme.

26 Sol bungem ejumjum efung bio, á tiri re, ejum ji ma lim Devid, ji wahng ka á ki li saang, etingitingi á lohkem jol saang.

27 Wo njahm efungfu nyehko, etoono efung nnyahng, eti ji Devid kpe tiki jolo nnehme nehme. Owo Sol kehm tongo Jonatan mmon ewe re, <<Jenji wahnge mmona Jese ki ba, ba li nsol, jol nyaane afii lela?>>

28 Jonatan faange re, <<Devid sahb gboong-m gboongo ko nsahm re, ye tohko je go Betlehem.

29 Á bungu re, <<Nong me n tohko je, tibre nnahb enyahre kp'bumu njom alimi go egahre ejahbe, fvfo abonanee tong-m re me n tob jol o. Nyehn-m ndon me n song, song nyehn abonanee ebame. Jia ji wahnge á ki ba go ekpukuru ji ntul.

30 Sol atahng kehme rake tob Jonatan, á kehm bungu tong-e re, <<Wo mmona nnenkal no kpo bvrvv edi fere jo lim edaangenne go elrang wo, wo nehme kahn re me n kp'kahne re, a yim mmona Jese njahma, ji li esono ka wo-a, ji tob li esono ka nnenkal no jel-e noa?

31 Ana mmona Jese li go elkpin go njini nyia, jol wo, jol etul eba nehm yiimi. Anv tum nne, bo song ko-e ba ka-m, á bahke tiki kpo!>>

32 Jonatan kehm bahbe nde re, <<Jenji wahnge á bahk-e wulu?>> Jenji á ma lim?>>

33 Wo Sol kehm roko elkong ene tv Jonatan re á wul-e. Owo Jonatan kehm lohko kahn re nde kp'lohko seb re á wul Devid.

34 Jonatan kehm mehle o ekpukuru a egburu erakatahng, etoono efung bi elkak nio, nsol á liim,

tibre eltim maange sehng tob nde, tib go esono ji nde jo ko fili Devid.

³⁵ Efungfu Jonatan soro lohng tahm ekul re á song kpiri Devid. Á fili mmonse no nlum,

³⁶ á tongo mmonse noo rea, <<Be song seb atake elban nya n kp'take a.>> Ana mmonse noo jo be asongo, á taa ntake elban siir-e sa.

³⁷ Eji mmonse song rehng edi ji ntake elban ni Jonatan gbo no, á kehm-e lungu, fere tong-e re, ntake elban li-a go es'song, jen song>>

³⁸ Owo á kehm rabe re, <<Foomo! Song el-waare! Ka yiimi! << Mmonse noo rodo ntake elban nio feere a ni ba ka nde nju.

³⁹ Mmonse noo joom kahn ejumjum bade ejum jia, sehngem Jonatan abola Devid, bo ba jo kahn.

⁴⁰ Owo Jonatan kehm kake mmonse noo nsol ebta enye, fere tong-e re, <<Song, rod nsol nyia wo song bum go ejahbe.>>

⁴¹ Eji mmonse noo ma tahm fi, Devid kehm lohngo go nkphko ejang eboblum eltal, ba gong ndi ka Jonatan nkpel era a esamahr ebe go ndi. Owo bo kehm bingi atemtem fere jo ling, wo Devid wo ga ling.

⁴² Owo Jonatan kehm tongo Devid re, <<Song go elkoono, tibre wahr ebtir ekpondahme go mbing nyi Jehova, fere bung re, <<Jehova wo li ntianse enyahre, ye j'nehm wo tob li ntianse nyi et'tohngo eja a et'tohngo ejame go njinanjini.> << Devid soro tahm, Jonatan tob feere ga ejahbe.>>

21

Devid Be Rehng Go Nob

¹ Devid kehm tahme go Nob re á song nyehn Ahimelek ji nlimanjom, Ahimelek jo k'kahn eji á ba kpir-e, á bahb-e re, <<Jenji wahnge a li a antahng? Jenji wahnge nnene ki li a na?>>

² Devid faange Ahimelek nlimanjom re, <<Ntul wo tum-m eltum, á tong-m re, <<Nnene k'kahn ejum ajehng ajehng bade eltum ni n kpa-a tumu.>> Bade aneblum ebame, me n tong bo re, bo ba kpir-m ekahmekahme edi.

³ Anv a, jenji a kpi no go ega ebo, ka-m ebred eblon me, afii ana a l'bel.

⁴ Wo nlimanjom faange Devid re, <<N kpimm abred nyehka nyehka, jol tvtv a, abred nya bo ma bum saang li a. Bo bahke ma li l'jol re aneblum bao ebyehke elbo go elnoongo anebkal.>>

⁵ Devid faange re, <<Eyaame ji elnoongo anebkal wahr ebbum go fee, ana wuku wuku kpo jol n l'si l'lohng. Agubjing nya aneblum baa li saang, Jol afi jolo ngare nyi ki li re bo jol saang, gohro t'tong lela!<<

⁶ Owo nlimanjom kehm-e kake ngbu nyi jolo saang, eji jolo re ngbu nyindiki jolem. Sehngem ngbu nyi jo jol go esamahr bi Jehova nyi bo ma yehke, fere yaange ngbu nyi kp'fubu go efung bi bo rodo no.

⁷ Ana jolo o, nlokeltum awohng no Sol jolo o efung bio, bo tohk-e bum o esamahr bi Jehova, bo jo lung-e re Doeg, nne Edom, á jolo ntubesia mbaabe ebul ewe.

⁸ Devid kehm bahbe Ahimelek re, <<Anv a, á kpimm elkong afii ekahngkahng aa? N fil-m ekahngkahng ebame a nsol ebta nyehko tibre eltum ni ntul tumu no jolo go elfoomo sehng.>>

⁹ Nlimanjom faange re, <<Ekahngkahng bi Go-layad nnea Filista no a wul-e no go edamme ji Ela bia a; bo kpennge mbomo li o njahma nkpehrekahbe ewobo nyi nlimajom. Joare a kp'sebe rod, ekahngkahng abehng abehng a kpeem li sehngem

Devid kehm bungu re, <<Bindiki kpeem li ana bio, ka-m ga.>>

Devid Be Rehng Go Gad

¹⁰ Efung bio Devid bee for go abo nya Sol tahm goji Akisi ntul no Gati.

¹¹ Wo aloketum ba Akisi tong-e re, <<Devid ntul no ndi nyia sang a? Ye sang bo kpo yim-e go ebo asea re: << <Sol ebwul atahltahl ba be, wo Devid ebwul atahla nku a nkuu ba be?>>

¹² Devid rodo alum nyaa kuuru go ege eltim lim-e, á kehme Akisi ntul no Gati fahl.

¹³ Owo á kehm soro yaange go ebo esamahr tvtv, eji á jolo o ebo abo, a fere jo lim ana ngbokosahla nne, jo tennge alok go abutahk eti mbu, eron jo lohng-e faabe ege elahng.

¹⁴ Akisi kehm tongo alokeltum ebe re, <<Nyehnen, nnenlum noa, yeb joobo. Jenji wahngé n ko-e ba ka-m?

¹⁵ Me wo agbokosahla ane ma lehng egama, ji wahngé n ko nne noa ba kehme nsol nyia lim go egame esamahra? Nne noa f'fuumu re á ba egame etahka?>>

22

Devid be rehng go Adulam a Mijipa

¹ Devid kehm tahme o Gati, be tahm go egohng ji Adulam. Eji abonanyehn a anebe etahk nde wuku ano, bo soro tahm song kpir-e o.

² Ane kpee ba edi jo riidi bo afii bo bele abong, afii bo jo nyehne erem, bo kame ba rur senng-e kak, á fere jol ntubesi no jo tv bo. Jolo rehng aneblum atahltahl ba jolo a ne.

³ O edi jio wo Devid tahme song rehng go Mijipa nyi Moab, song tong ntula Moab re, <<Titi, nongo nsoo, a nnee, bo ba jol a na tete me n kahn ji Esowo bahke limi ka-m.>>

⁴ Owo á tahme bo sa goji ntula Moab, bo jolo a ne go afung nya Devid jolo go ekobta.

⁵ Wo nnyehnamahra Gad tongo Devid re, <<Ka sa o ekobta. Song go ndi nyi Juda.>> Owo Devid kehm tahme go ekulugbe ji Hereti.

Sol wulu nlimanjom go Nob

⁶ Ngare nyia Sol kehm wuku re, Devid a aneblum ebe bob nyehn bo. Sol noa jehk a elkong go ebo go nnahb eti ji bo kpo lung re tamarisk, go ewong ji Gibeá a atubesi alimi eltum ebe kpee yim go ege a nkpe.

⁷ Á kehm tongo bo re, <<Wuungu atung aneblum ba Benjamin! Anv mmon no nlum no Jese bahk-n ma ka adi ebgbe kpee a adi ebgbe agreba? Á bahk-n limi n jol atubesi nsoja ane atahltahl atahltahla a atubesi nsoja ane atahl alon alona?

⁸ Ano wo wahnge wahn kpee ma lam kak-ma? Nnene me-e tongem egahne ellong ngare nyi mmon ewame koo nwongo a mmona Jese. Nne awohng awohng ewahne lim no tiir-m no

afii tong-m re mmon ewame yim njahm nyi nlokeltum ewame re bo noongo sik nok aname, ana á kp'limi lela.

⁹ Wo Doeg nnea Edom, ye ji yiimi a atubesi alimi eltum ba Sol, kehm bungu re, <<N nyehne mmona Jese ma ba goji Ahimelek ji mmona Ahitub go Nob.

¹⁰ Ahimelek wo bahbe Jehova ka-e. Á tob ka-e nsol alehke, a ekahngkahng bi Golayad nnea Filista.

¹¹ Owo ntul kehm tumu tv Ahimelek ji nliman-jom ji mmona Ahitub a aneblum kpee ba jolo nnahb enye, bo ji jolo abalimajom go Nob, bo kpee kehm bake goji ntul.

¹² Sol bungu re, <<Wuung-m atung anv, mmona Ahitub.>>

Á kehm-e faange re, <<Ee nsoo ewame.>>

¹³ Sol kehm bungu tong-e re, <<Jenji wahnge a ma lam kak-m, wo a mmona Jese, á ka-e abred a ekahngkahng, fere bahb ntir nyi Esowo ka-e, ebwahng anv, á kp'noongo sik re á nok aname, ana á kp'limi lelai?>>

¹⁴ Ahimelek kehm faange ntul re, <<Nne awoo go ellong alokeltum eba no nne bahke bumu go etingitingi ana Devid, ye ji li nnara ntul, ntubesi ab'baabe eba no kpi ekpunu go nlaaga enya kpee?

¹⁵ Efung bio bi li na ngbokambang efung bi m ma bahb Jehova ka-ea? Jol efung bio bi bi sang. Nong ntul k'ka me nlokeltum ewa ebi, afii nnahba nde, jol me nlokeltum ewa nehme kahn ejumjum bade nsol nyia kpee.>>

¹⁶ Wo ntul kehm bungu re, <<Wo Ahimelek á bahke tiki kpo na a nnahb a nnahb enya kpee.>>

¹⁷ Owo ntul kehm kake ab'baabe ebe ba yim-e nkpe re, <<Senngen wahn wul abalimajom ba Jehova, tibre bo fvfo tob yim njahma Devid. Bo kahne re, á jo be na, jol bo me-e tong-m.>>

Wo atubesi alimi eltum joom kor bo re, bo tab ebo wul abalimajom ba Jehova.

¹⁸ Ntul kehm kake Doeg eko re, wo sennge, wo wul abalimajom.>> Owo Doeg nnea Edom kehm sennge wul bo. Efung bio á wulu ane atahl ani ane alon ba liibi akpehrekahbe awobo nya abalimajom.

¹⁹ Fvfo á tob wulu anebe Nob go ekahngkahng, ejahbe ji abalimajom, aneblum, anebkal, abonse a abonbili, adahmagbudu, ebvankang go ejoro.

²⁰ Wo mmon awohng no Ahimelek mmona Ahitub no bo jo lung-e re Abiata, á be for song tob Devid.

²¹ Á tongo Devid re, Sol ebwul abalimajom ba Jehova.

²² Owo Devid kehm tongo Abiata re, <<Efung bio eji Doeg nnea Edom jolo o, n kp'kahne re, á bahke tiki tong Sol. Me wo wahnge ewul ma yel tob nnahb enya kpee.

²³ Jol aname a, ka kpe fahl. Nnenlum no kp'sebe re á wul-a, kp'tob gaare re á wul-m fvfo. A bahke foro aname aname.>>

23

Devid Tahre Anebe Keila

¹ Efung abehng, eji bo tongo Devid re, <<Nyehnee, anebe Filista kp'noko a anebe Keyila fere jo kpu nsol mbahma ndi ebo, edi ji bo kpo febe nkohl.>>

² Owo Devid kehm bahbe Jehova re, <<Me n song nok a anebe Filistaa?>>

Jehova faang-e re, <<Song, wo song nok a anebe Filista fere tahre ejahbe Keyila.>>

³ Wo aneblum ba jolo a Devid tong-e re, <<A na Juda e kp'fahle, kehm jolo renan re, wahr tahm go Keyila song nok a nsoja nyi anebe Filista!>>

⁴ Devid kpe bahb Jehova, Jehova faange re, <<Song go Keyila, tib m bahke yake anebe Filista kak ega ebo.>>

⁵ Owo Devid a nsoja enye, bo kehm tahme go Keila, song nok a anebe Filista fere wul atohkondi ebo. Devid tane anebe Filista gbalee, tahre anebe Keyila.

⁶ <<Ngare nyia Abiata mmona Ahimelek rodo nkpehrekahbe ewobo ji nlimanjom ba a ji, eji á be ba tob Devid go Keyila.>>

Sol Jo kame Devid

⁷ Bo tongo Sol re, <<Devid ebtahm go Keyila, fvfo á kehm bungu re, <<Esowo me-e yake kak-m go egame abo, tibre Devid ebkak elne ngbekobo, eji á song yel ejahbe ji kpi ati mbu akuungu.>>

⁸ Sol kehm lungu nsoja enye kpee re bo tahm ebta go Keyila song kohko Devid tv a aneblum ebe.

⁹ Eji Devid sebe kahn re Sol kp'lame kak-e, á kehm tongo Abiata ji nlimanjom re, <<Ko nkpehrekahbe ewobo ji nlimanjom ba a ji.>>

¹⁰ Devid bungu re, <<Jehova Esowo bi anebe Isreel, me nlokeltum ewa ebwuk riirii re, Sol kp'toobo re á ba a Keyila ba ranng'e ejahbe tib esi ejame.

11 Anv afono ejahbe baa ba Keyila, bahk-m jabbe ka-e? Sol bahke lohko ba ana nlokeltum ewa ma wuka?

Jehova, Esowo bi anebe Isreel, tong nlokeltum ewa.>> Jehova bungu re, <<Á bahke bake.>>

12 Devid kpe bulu bahb re,<<Anv anebe Keyila bahk-m jabbe a aneblum ebame ka Sola?>>

Jehova bungu re, <<Bo bahke limi ano.>>

13 Owo Devid a aneblum ebe, bo jolo rehng ane atahltahl ane atahl awubu, bo kehm yake Keyila jo jen yanng e adi adi. Eji bo tongo Sol re Devid ebbe go Keyila, á kpeem je o.

14 Devid song jolo go elka emahng ni ekobta, a awong nya emahng ji Jif. Efung abehng abehng Sol jo bimi Devid. Wo Esowo tikem yake Devid kak-e abo.

15 Ana Devid jolo go ejahbe Horesi go emahng ji Jif, á sebe kahn re Sol eblohng re á song wul-e.

16 Jonatan mmona Sol kehm tahme goji Devid go Horesi song kak-e ebo, á bel atahne goji Esowo.

17 Á tong-e re, <<Ka kpe Fahl.>> <<Nsoo ewame Sol wa-a nehm kunu ebo. Á bahke jolo ntul no anebe Isreel. Me m bahke jolo ekpee eja. Jol nsoo ewame kp'kahne jia.>>

18 Bo ane abal abal ko nwongo gbanngalung atemtem. Owo Jonatan kehm feere kehng e, wo Devid sa go Horesi.

19 Anebe Jif kehm tahme goji Sol go Gibe a song tong-e re, <<Nyhne Devid ebsong biiri go egahre ekobta go Horesi, go ewong ji Hakila go ejang eboblum bi Jesimon.

20 Anv, ntul Agbal Enya, ba ngare anyehng anyehng nyi l'kor-a re wo lim ano, wahr bahke yiimi re wahr yak-e kak-a abo.>>

21 Sol faange re, <<Nong Jehova fuul-n.>> go egahne eltiiri ni m ma-m tiiri.

22 Songen, wahn kpe song seb kahn nobnob. Seben kahn edi ji Devid kpo kono eljeke a nne no me-e nyehn o. Bo tong-m re, á kp'wake sehng.

23 Seben kahn adi elbiiri enye kpee nya á kpo biiri, wahn feere ba tong-m nobnob. m bahk-e sebe go ndi nyi Juda kpee, a abon ajahbe Juda.

24 Owo bo kehm feere go Jif gbo Sol mbang. Devid a aneblum ebe bo jolo elka emahng ni Maon go edamme ji Araba ejang eboblum bi Jesimon.

25 Sol a aneblum ebe kehm tahme song kehme elbimi, eji bo tongo Devid bade ano, á mehle tahm go agburu atal song jol go elka emahng ni Maon. Eji Sol wuku jia, á tahme asongo go elka emahng ni Maon jo kam Devid.

26 Sol jo jene asongo go nkpe ewong, Devid a aneblum ebe jol go nkpe ewong nyehka jo foomo re bo be goji Sol. Ana Sol a nsoja enye jo kabbe Devid a aneblum ebe re bo bob bo,

27 ntiingi etib kehm bake goji Sol ba bung re, <<Ba elwaare anebe Filista ebbohngo ga kp'noko ebta a Isreel.>>

28 Sol rahke elkame ene, ni á jo kam Devid, feere song re á song kpiri anebe Filista. Owo wahnge bo kpo lung edi jio re, Ekpartal ji Elyaame .

29 Fvfo, Devid tahme edi jio song lene go edi ekobta ji En Gedi.

24

Devid Yake Sol re á Jol go elkpín

¹ Ngare nyi Sol ma feere kehng eji á jo kam anebe Filista, bo tong-e re <<Devid li go elka emahng ni En Gedi.>>

² Owo Sol kehm rodo, ane atahl alon alon go eltahl a nkpel ewubu,(3,000) ajangkun nya li eko eko go Isreel kpee, lohng a bo jo seb Devid a nsoja enye, kohlo go Akpartal nya Ebulemahng.

³ Á kehm bake go edi ellong ejoro mbang mbang, egohng jolo o. Sol yele o re á song re ekv. Devid a aneblum ebe, bo jolo go fee njahm egohng j'nehm.

⁴ Nsoja nyi Devid kehm bungu tong Devid re, Aneblum bao bungu re, <<A wo li efung bi Jehova bungu no, eji á bungu tong-a re, <<M bahk-a kake anekv ewa go ega abo, eji a l'lim-e ana kor-a no.>> Owo Devid kehm tohngo sehng edi ji bo ki kahn, song kim es'sili ekpawobo ji Sol.

⁵ Eji ma jol ano sehng, ntir nyi Devid kehm-e kehme elgbiingi, tib eji á kimi es'sili ekpawobo ji Sol.

⁶ Á tongo aneblum ebe re, <<Jehova k'taame re me n lim elkohn ejum ana jia tob nsoo ewame nju, nne no Jehova kak-e akehng go esi, afii kun-e ebo ebame, tibre ye nne no Jehova kak-e akehng go esi wo bob-e etul.>>

⁷ Go alum nyaa Devid sahb r'rehke aneblum ebe, á taamem re bo nok a Sol. Sol lohngo egohng jio tahm mbang enye.

⁸ Owo Devid kehm lohngo go egohng jio, kehm lungu Sol, <<Nsoo ntul ewame!>> Eji Sol keebe go

njahm, Devid kehm gongo go ndi fere tanne elne, a esamahr ebe go ndi.

⁹ Á bungu tong Sol re, <<Jenji wahnge a kpo wuungu atung, aneblum l'bung re, <<Devid jehk kp'siki, re á lim-a ejum?

¹⁰ Lela wobnyehn go ega amahr antahng ana Jehova ma-a jabbe kak-m egame abo a egohng. Egom jehko nyar-m re me n wul-a, wo n tab-a yake, m bungu re, <<M nehm rod ebo ebame kunu nsoo ewame nju, tibre ye nne no Jehova kak-e akehng go esi wo re á jol ntul.

¹¹ Nyehn me nsoo ewame, seenge es'sili ekpawobo eja ga egame ebo, n kimi es'sili ekpawobo eja, wo n wa-a wulem. seenge nyehn re, ejumjum egame ebo wobem ji bahke tibi re me n li ebi go esabe ellimi afii go elnoko. N wa-a ka soodo, wo ga a kp-m bimi re wo ko elkpin ename.

¹² Nong Jehova lam-r a wahra na, nong Jehova bongo nsoodo nyi a ma-m lim, wo ebo ebame wa-a nehm kooro.

¹³ Ana bo bungu mahne re, <<Goji abalimabibi wo ebi ellimi kpo lohng," ebo ebame wa-a nehm kooro.

¹⁴ <<Nne awoo no ntul no anebe Isreel ma l'lohng toon-e? Nne awoo a kp'kame toon-e, ekpakh mbva? Ntakpehla?

¹⁵ Nong Jehova jol nlamalam ewahre fere toobo ka-r. Nong á tir bade nfem enyame fere fili o, nong á bib aname, nong á tahr-m yehke go ega ebo.

¹⁶ Eji Devid ma bung mal, Sol kehm bahbe re, <<Ellum ena ni oa, Devid mmon ewama?>> Á kehm rabe eling wahre wahre wahre.

¹⁷ Á kehm bungu re, <<Wo wo ga li etingi nne sehngre me, wo ma-m fili nobnob. Me ma-a bib elfili.

¹⁸ A ma-m tong anv anv bade nnoobo nyi a ma lim ka-m, Jehova yak-m kak go ega abo, wo me-e a wulem.

¹⁹ Nne l'song nyehn nnekv ewe, á kpo yak-e yaka ki-e lim ejuma? Nong Jehova tuur-a nobnob go mbang nyi a ma-m fili lela.

²⁰ N kp'kahne re a bahke jolo ntul go etingitingi, etul bi Isreel bahke gbale ega abo.

²¹ Anv, tir tong-m go mbing nyi Jehova re, á nehm wul et'tohngo ejame kpee, afii fvvdv mbing enyame go nnahba nsoo.>>

²² Ano wo Devid kehm koko nwongo enye a Sol. Owo Sol kehm feere kehngre, wo Devid a aneblum ebe feere go edi ekobta.

25

Elkv ni Samuwel

¹ Samuel kehm ba kpo, anebe Isreel kpee lohng ba kono asi ling-e, tete bo kpa-e kak ege etahk ji Rama. /s

Devid, Nabal a Abigail

Devid mehl feere go elka emahng ni Paran

² Nne awohng jolo go Maon, no bele nsol o Kamel, á gbo afang gbalee. Á bele ebulbaange, atahl alon alon go nkpel ewubu (1,000), ejoro atahl alon alon go eltahl a nkpel ewubu (3,000), bi á jo kpud bo anyar go Kamel.

³ Mbing anye bo jo lung-e re Nabal, mbing nyi nkal ewe Abigail. Abigail bele elkahne, á

jolo nnenkal no gbo egbahme, wo nlum ewe jolo ntehne eljina nne, fere bel esabel eljini go nnahb nyi Keleb.

⁴ Eji Devid jolo o elka emahng, á wuku re Nabal kpi ejoro anyar kpud.

⁵ Owo á kehm tumu njangkun ewubu fere tong bo re, <<Songen goji Nabal go Kamel wahn song kak-e nnyo go egama mbing.

⁶ Tongen ye re, 'Nlaabe elkpin jol ka-a! Nong nob a na, a anebe etahk eba kpee, tob nob a ejum ajehng ajehng eja kpee!

⁷ << 'Anv me n wuk re ngare nyi bo kpo kpud ejoro anyar nyi a. Eji abaabe ebul eba jolo anahre e bibem bo go elfili ngare kpee nyi bo jolo anahre go Kamel, ejum ebo ajehng ajehng limm ji tane no.

⁸ Bahb alokeltum eba, bo bahk-a tongo. Fvfo nong aneblum ebame fil-a ndon, eji li re, wahr ebba go ngare nyi nno. Titi ka alokeltum eba a Devid mmon ewa ajehng ajehng ji a bahke ma bel ka bo.' <<

⁹ Eji aneblum ba Devid rehngge go ji Nabal, bo song tiingi Nabal etib bio go mbing nyi Devid. Bo fere ji sik.

¹⁰ Nabal faange alokeltum re, <<Nne awoo li Devid jia? Nne awoo li mmona Jese noo?. Alokeltum gbalee kp'beke babnde nju ebo sa lela.

¹¹ N'nan m bahke rodo ngbu a alahb a enyam bi m ma wul re me n ka abakpudu ejoro anyar ka aneblum ba lohngo ba edi ji nne kil kahne?

¹² Aneblum ba Devid senngge feere. Eji bo rehngge no, bo tooro ellum anehng anehng tong Devid.

¹³ Devid kehm tongo aneblum ebe re, <<Nne awohng awohng gbade ekahngkahng ebe.<< Bo lohko lim, Devid tob gbade b'be fvfo. Jolo ejum ane atahltahl ba toono Devid, ane atahl awubu sa jo kpur nsol.

¹⁴ Nlokeltum awohng kehm tongo Abigel nkala Nabal re, <<Devid tumu abatiingi etib go elka emahng re bo kak nsoo ewahre nnyo, wo á koo akuk faange bo.

¹⁵ Fvfo aneblum bao jolo nobnob anahre. Bo wahr bibem elfili, ngare kpee nyi wahr jo lohng je go emahng kohlo bo, ejumjum tikem tan.

¹⁶ Atv a njul bo jolo ekahme senng-r kak ngare anyehng anyehng nyi e jo kpur ejoro kohlo bo.

¹⁷ Anv, tir bade wo nyehn ji wo bahke ma lim, tibre ebi ejum tohk nsoo ewahre nju go nnaahb, a anebe nlaaga ebe kpee. Á li elkohn ebi nnenlum no nne l'k'bung a ne.

¹⁸ Abigel soro mehl tvtv. Á rodo ebred atahl awubu, ekpasake amahm ebbal, ejoro elon bi bo ma lam, ebam awoko akohl eblon, abane bane ngbu atahlalon, abred atahlawubu nyi bo ko efig lam, á kpu gbade ebvankang.

¹⁹ Á kehm tongo alokeltum re, <<Song tahmen; M bahk-n toono njahm.<< Wo Nabal nlum ewe á we-e tongem.

²⁰ Ana á kuumu mbvankang song rehng go ewong ji bele akpafuku, nyehn Devid kp'badde abake a aneblum ebe, Abigel song wane bo.

²¹ Devid kp'bungu na re, <<Jolo ejum mbol mbol, eji n jo baabe nsol nne noa go elka emahng

re ejum ajehng ajehng eje k'tan. Á feer-m ebi go nnoobo nyi n limi no.

²² Nong Esowo bib a Devid, sahb s'sab, joare efungfu m bahke yake nnenlum awohng jol go elkpín, go ellong ane ba li ba be.

²³ Eji Abigel nyehne Devid, á soro badde mbvankang elwaare ba gong ka Devid a esamahr ebe go ndi.

²⁴ Abigel gbo-e go akpade fere bung re, <<Nong me nlokeltum ewa fil-a ndon nsóo ewame, nong me nlokeltum ewa bung a na, wuk ji nlokeltum ewa yahke bung.

²⁵ Titi nsóo ewame, ka wuk ebi nnenlum noo re Nabal. Á li ana mbing enye, mbing enye lohngo re Egboolo, fvfo á kpo lim agboolo nsol. Ana me nlokeltum ewa, n nyehnem aneblum ba wo nsóo ewame tumu no.

²⁶ Wo anv nsóo ewame, ana li go etingitingi, Jehova ye ji li Esowo eba, á li go elkpín, wo tob li go elkpín, eji Jehova ma-a yehke re, wo k'song fad alung, fere yehk-a re wo k'bongo go ega ebo antahng, nong anebekv eba, a ane kpee ba kp'tiri re bo lim wo nsóo ewame nju ejum, jol ana Nabal.

²⁷ Nong ayare nya me nlokeltum ewa ma ko ba ka wo nsóo ewame nju, nong bo ka aneblum ba toon-a no.

²⁸ Titi tahm ka me nlokeltum ewa go ege elsoodo ni á ma lim. Jehova, ye ji li Esowo eba, bahke tiki lim efilane eja lab ka nsóo ewame nju, tibre á kp'noko ebta bi Jehova, bo nehm nyehn esabe ellimi anehng anehng go ega ejang go afung nya a li go elkpín.

²⁹ Jol tvtv o, eji nne kp's'seb re á ko elkpín ena, elkpín ni nsoo ewame nju bob behr go elwo ni elkpín goji Jehova, ye ji li Esowo eba, bahke bulu elkpín ena go ellong ane ba li go elkpín, wo elkpín ni anebekv eba, á bahke gbahbe tub ana eltal ni wob egbasad.

³⁰ Ngare nyi Jehova ma lim anoobo nsol biingi ka nsoo ewame nju, nya á nyame no bada ne fere yehk-e re, ye wo bahke fili anebe Isreel,

³¹ wo nsoo ewame nju, we-e nehm ga kpo esi, go ege a ntir re, alung afade lohngem ejumjum, afi jol re á bongo antahng. Eji Jehova, ye ji li Esowo ebo ma ka nsoo ewame nju efa, buumu me nlokeltum ewa.

³² Devid kehm tongo Abigel re, <<Eltehke jol ka Jehova, Esowo bi anebe Isreel, ye ji ma-a tum lela re wo ba kpir-m.

³³ Nong elfuulu jol a na go ega nnoobo a ntoobo, a elyehke ni a ma-m yehke re me n k'fad alung lela, a elbongo ni n jol koko abo enyame bongo.

³⁴ Ki li ano, etingitingi ana Jehova, ye ji li Esowo bi anebe Isreel bi li go elkpín, ye ji ma-m yehke re me n ki-a lim ejum, ki li re wob ba elwaare ba kpir-m, jol nnenlum awohng awohng no li ka Nabal jolem kpe jol go elkpín efungfu l'se.

³⁵ Owo Devid kehm koko ji á ko go ege ebo re á ba ka-e, fere tong-e re, <<Song kehng go elkoono, me n wuk alum enya, fere lim ji a bahb-m no.<<

³⁶ Eji Abigel feere goji Nabal, Nabal jo limi elkak go etahk ana elkak ntul. Nabal gbale go eyebatahng eji á wo jo buumu. Abigael we-e tongem ejumjum tete efungfu se.

³⁷ Efungfu eji Nabal amahm me-e ter, nkal ewe kehm-e tongo nsol nyio kpee, eltim gbo-e, á fere jol are eltal ni.

³⁸ Kange ejum nfung ewubu, Jehova rum Nabal tub, á kpo.

³⁹ Eji Devid wuku re Nabal ebkpo, á bungu re, <<Eltehke jol ka Jehova, ye ji ma toobo elam ejame a Nabal, go ebibi elfili edaange nne. Yeb yehke nlokeltum ewe go ebi alimi, fere rod ebi ji Nabal kun-e go esi.

Owo Devid tumu ellum tv Abigel, bahb-e re á jol nkal ewe.

⁴⁰ Alokeltum Devid kehm tahme go Kamel song tong Abigel re, <<Devid wo tum-r re, wahr ba ko-a wo ba jol nkal ewe.<<

⁴¹ Á kehm gongo esamahr ebe go ndi kehm bungu re, <<Me nlokeltum ewa wo, me n toobo ebjing re me n lok-a fere ru akpade nya alokeltum ba nsoo ewame nju.

⁴² Abigel soro foomo tvtv kuumu mbvankang a alokeltum anebkal ebe na alon, bo toono atiatingi etib Devid, á song jol nkala Devid.

⁴³ Devid tob ko Ahinoam nnea Jejirel, bo ane abal abal bo jol akal ebe.

⁴⁴ Wo Sol rodo Mikel mmon ewe, nkala Devid, ka Paltiyel mmona Laisi ye ji lohng go Galim.

26

Devid Kpe Ten Sol Go Elwulu

¹ Anebe Jifi kehm jeke goji Sol go Gibeá song tong-e re, <<Devid sang ma ba biiri go ewong ji Hakila ji li songo songo wane a Jesimona?<<

² Owo Sol kehm tahme go elka emahng ni Jifi a nsoja nyi anebe Isreel, bo jolo ane atahl alon alon go eltahl a nkpel ewubu (3000) ba bo jake no, re bo song seb Devid.

³ Sol bumu ebehre eje kohlo nkpea mbang go ewong ji Hakila jo seenge Jesimon, wo Devid jolo go elka emahng, eji á nyehne re Sol me-e toono rehng o,

⁴ á tumu ane ba kpo weele nyehn edi, lohko kahn re, Sol ebsi r'rehng o.

⁵ Owo Devid kehm tahme edi ji Sol bo si ebehre. Á nyehne edi ji Sol a Abne mmon a Ner, ye ji jolo ntubesi a nsoja noongo no. Sol noongo go atahng ebehre, nsoja woomo ebehre senng-e kak.

⁶ Devid bahbe Ahimelek nnea Hiti go Abisayi mmona Jerua, ye ji jolo mmonannyehe na Joab re, <<Nne awoo bahke jeke aname go abehre goji Sol? Abisayi re, <<Me m bahke jeke.<<

⁷ Owo Devid a Abisayi kehm tahme goji nsoja nyio atv.. Bo nyehne Sol nong no, á ma lal go atahng ebehre, a elkong ene, á jahme kohlo ege esi. Abne a nsoja noongo senng-e kak.

⁸ Abisayi kehm tongo Devid re, <<Lela Esowo ebyake nnekv ewa kak ega ebo, nong me n jahm-e elkong nkpel anyehng bade ndi. N we-e nehm jahm nkpel ebal.<<

⁹ Wo Devid tongo Abisayi re ke-e ranng-e, nne awoo bahke lake nne no Jehova me-e kak akehng go esi k'li ebi?

¹⁰ Á bungu re, <<Etingitingi ana Jehova li go elkpín, Jehova antahng wo bahk-e rumu, afi

ngare enye rehng, á kpo, afi á je ebta song kpo ebta tan.

¹¹ Wo Jehova k'taame re, me n lak nne no á me-e kak akehng go esi ebo. Rod elkong a eksp'kpuk alahb ji nong kohl-e go esi wahr tahm.

¹² Owo Devid kehm rodo elkong a eksp'kpuk alahb ji jolo kohlo ege esi, bo tahm. Nnene nyehnem bo, afi kahn bade, jol nnene nyahmem. Bo kpee jo l'lal tibre Jehova wo limi bo re bo sahb l'lal ano.

¹³ Devid kehm take tahm ejang behko, song wahr kuumu ero ewong go fee. Ka bo egburu eyake njahm ebal ebal.

¹⁴ Á kehm lungu nsoja a Abner mmona Ner, <<Abner a me nehm faanga?>> Abner kehm faange re, <<Wo nne awoo no kpi ntul lung?>>

¹⁵ Devid kehm bungu re, <<Nde, wo nnenlum wo, ano sanga? Nne awoo li ana wo go Isreel? Jenji wahnge a ki kpe baabe nso, ntul ewa? Nne ba o, re á ba ranng nso ntul ewa.

¹⁶ Ji á ma lim nobem. Etingitingi ana Jehova li go elkpín, kehn anv, wo a ane eba wahn ebkpo, tibre a ma-m baabe nso ntul ewa, ye ji Jehova kak-e akehng go esi. Kpur senng elna. Gan wo elkong a eksp'kpuk alahb ntul ji jolo kohl-e esi li no.

¹⁷ Sol kehm liingi ellum ni Devid, fere bung re, <<Ellum ena ni oa Devid mmon ewama?>>

Devid faange re, <<Ee, n'ni, nsoo ntul ewame.>>

¹⁸ Á kpe budu re, <<Jenji wahnge nsoo ewame kp'kame nlokeltum ewe? Jenji m ma lim, elsoodo anii m ma li ebi?

19 Anv nsoo ntul ewame, wuungu atung wuk alum nya nlokeltum ewe. L'fere jol re Jehova ma-a tehm tv-m, nong á ko ayare. L'fere jol re ane ba ma lim ano, nong bo bel nkuk goji Jehova. Bo ma-m kam lela yehke go mbake enyame go nsol elehkelkv nyi Jehova, fvfo bung re 'Song, loko asowo nyako.'

20 Anv ka nongo alung emame gbo go ndi njahm ejahbe go fee go esamahr bi Jehova. Ntul no anebe Isreel eblohng kp'sebe aroongo ana nne kpi a akpamban bim go awong.

21 Owo Sol kehm bungu re, <<Me n lim abiafem. Feere ba Devid mmon ewame. Tibre wob tiiri elkpin ename sahb gb'gbal lela, n nehm kpe gaare re me n lim-a ejum. Etingitingi me n lim ana egboolo nne, sahb s'sab ellimi ranng.

22 Devid kehm faange re, <<Nyehn elkong ni ntul ga. Nong njangkun anyehng enya ba ko.

23 Jehova kpo tuuru nne awohng awohng go ebo ellimi nobnob a ekakesehk ebo. Jehova yak-a kak-m go egame abo lela, wo me n nehm lak nne no Jehova kak-e akehng go esi ebo ebame.

24 Etingitingi, ana elkpin ena lub-m no lela, nong elkpin ename tob lub Jehova á tahr-m yehke go afemfem kpee.

25 Owo Sol kehm bungu tong Devid re, <<Nong elfuulu jol a na Devid mmon ewame, a bahke limi agburu nsol, etingitingi a bahke sehng ehta.<< Owo Devid kehm tahme mbang enye, Sol feere kehng.

Devid Go Ellong Anebe Filista

¹ Wo Devid tiri antahng re, <<Efung abehng Sol bahke lohko ba wul-m ege ebo. Ji bahke fuumu re me n lim li re, me n be tahm go ndi nyi anebe Filista. Owo Sol bahk-m rahke elsebe go ndi nyi anebe Isreel, m bahke weelee lohng go ege ebo.

² Owo Devid a aneblum atahl alon alon nkpel atahlara, (600) ba jolo a ne, bo kehm tahme goji Akisi mmona Maok, ye ji jolo ntul no Gati.

³ Devid a aneblum ebe, bo song lene go Gati tob Akisi. Nne awohng awohng bele nnahb ny'nye nyi jolo a ne. Devid bele akal abal, Ahinom nnea Jejireel, a Abigel nnea Kamel, ye ji jolo nkalebun no Nabal.

⁴ Eji bo tongo Sol re, Devid ebbe tahm go Gati, á we-e kpeem jo seb.

⁵ Owo Devid kehm tongo Akisi re, <<Joare m ma-a fili ndon, ka-m edi ji m bahke jolo go mmojahbe fee go nfam nyia. <<Jenji wahnge me nlokeltum ewa bahke lene ejahbe ajehng a ntul ? >>

⁶ Owo efung bio Akisi ka-e Jikilag, edi jia jolo ka atul ba Juda alela sang.

⁷ Devid lene go ejahbe anebe Filista elya kunu nnyahng eni.

⁸ Owo Devid a ane ebe, bo kehm tahme song kehme elnoko a anebe Gesu, a anebe Girji, go anebe Amalek. (Bomo mahne mahne ane baa lene edi ndi jio, nyange rehng go Sur a Ijib.)

⁹ Ngare anyehng anyehng nyi Devid l'song nok a ejahbe ajehng ajehng, á joom yake nnenlum, afii nnenkal re bo jol go elkpin. Wo á jo

rodo ejoro, adahmagbudu, ebvankang, akamel a abomo. Fere feere ba tob Akisi.

¹⁰ Akisi l'bahb re, <<Gan wo a je enok lela?<< Devid jo bungu re, <<E je ebta go ejahbe elka emahng ji li ka et'tohngo ji Juda. Nkpel nyindiki á bung re, e je ebta go ejahbe elka emahng edi ji anebe Jerameel lene no. Nkpel nyindiki á bung re, e je ebta go ejahbe elka emahng ji anebe Ken lene no."

¹¹ Á joom tiki yake nnenlum afi nnenkal re bo jol go elkpin, ko bo ba ka Gati, á jo tiri re, <<Bo bahke bungu bade anahre re, 'Jia ji Devid ma lim.' Eljini ene ni o ni á jo kono ellimi go afung kpee nya á lene go edi ndi ji anebe Filista.

¹² Akisi bumu Devid go etingitingi, fere bung tong elne re, <<Yebjol nne no kp'bibi eltim a ane ebe, anebe Isreel, tib ano, á bahke jolo nlokeltum ewame nkahlkahl.<<

28

Sol je elbu goji Nnea njom go Endor

¹ Go afung nyao anebe Filista lungu nsoja ebo ba kono re, bo nok a anebe Isreel. Akisi kehm tongo Devid re, <<Fuumu re wo Kahn re, wo a aneblum eba, m bahk-m toono ba ebta.

² Devid bungu re, <<Owo a bahke nyehne antahng ana nlokeltum ewa bahke limi.

Akisi faange re, <<Ebnob sehng, m bahk-a limi a jol mbaabe ebjing ewame nkahlkahl.<<

³ Ngare nyio Samuel ebkpo, anebe Isreel kpee ba elkv, fere ling-e tete rod-e kpa kak ege ejahbe Rama. Ngare nyio fvfo Sol kame abuku mbu a anebe abi atohko, kpee yehke ndi nyio.

⁴ Anebe Filista kehm ba kono, si ebehre go Sunem. Sol tob lung anebe Isreel kpee bo ba kono tob si ebehre go Gilboa.

⁵ Eji Sol nyehne nsoja nyi anebe Filista, á kehme elfahle, fere jo k'kahm go ege eltim.

⁶ Á bahbe Jehova, wo Jehova we-e faangem, jol go nlem afii go elfaange ni bo kpo lung re Urim, afii enyehnamahr.

⁷ Owo Sol kehm tongo ane ba kpo lim eltum a ne re, <<Seben nnenkal no li mbuku elbu, eji n l'je song bahb-e.

Bo tong-e re, <<Nnenkal awohng noa go Endo.

⁸ Owo Sol kehm yaange nsol ebjing, fere kak nyindiki nyi nne li ki-e ma liingi, atv á ba tahm a aneblum abal song kpiri nnenkal, fvfo á tong-e re, <<Bahb etohko ka-m, wo ko etohko ji nne no ma kpo no m bahk-a tongo.

⁹ Wo nnenkal noo tong-e re, <<Etingitingi, wo kp'kahne ji Sol ma lim, yeb kam abuku mbu a anebe abi atohko yehke go ndi nyia. Jenji wahnge a yahke kono ekpoko bade elkpín ename, ji bahk-m wulu.

¹⁰ Sol kehm tiri tong-e go mbing nyi Jehova re, <<Etingitingi ana Jehova li go elkpín, bo wa-a nehm kak erem go eyaame jia.<<

¹¹ Owo nnenkal noo kehm bahbe re, <<Nne awoo m bahk-e koko ba kaa?

Sol re, <<Ko Samwel ba a ne.<<

¹² Eji nnenkal nyehne Samwel, á kehm biingi ege ellum bung tong Sol re, <<Jenji wahnge a ma-m nehm? Wo Sol wo!

13 Ntul tong-e re, <<Ka kpe fahl. Jenji a ma nyehn?<< Nnenkal re, <<N nyehne ebi etohko kp'lohngo go ndi abake.

14 Á kehm bahbe re, <<Á li renan?<< Á re, á li ana ek'kula nnenlum, á kake ekpawobo kp'lohngo abake.

Owo Sol soro kahn re Samwel wo, a gongo go ndi tanne elne, esamahr ebe go ndi.

15 Samwel kehm bungu tong Sol re, <<Jenji wahnge a ma-m gbiingi ko-m ba aname.

Sol re, <<N li go egburu ejahkjahk.<< Anebe Filista kp'noko aname, Esowo ma-m yake abo. Á me-e kpehme kpe faange, fere jol go enyehnamahr afii go nlem. Owo wahnge n lung-a re, wo tong-m ejum ji m bahke limi.<<

16 Samuel kehm bungu re, <<Jenji wahnge a kehm-m bahbe, anv eji Jehova ma-a yake, á ma fere jol nnekv ewa?

17 Jehova eblim ji á bungu sehng egame. Jehova ebyare etul yehke go ega abo, faake abi ka nnebjing ewa Devid.

18 Tibre a wukem ji Jehova, afii rod erakatahng eje rehng a ji goji anebe Amalek, Jehova eblim jia ka-a lela.

19 Jehova bahk-a yake, wo a anebe Isreel kak anebe Filista go abo, behna wo a abon eba ba nlum, m bahke jolo aname. Jehova bahke tob yake nsoja nyi anebe Isreel kak abo nya anebe Filista.<<

20 Tvtv o Sol soro gbo tanne go ndi, elfahle gbal-e sehng eji á wuku alum nya Samuel. Eko tan-e tibre ejumjum á liim efung bio kpee a atv mao kpee.

²¹ Eji nnenkal noo baa goji Sol ba nyehn re, á bele elfahle tete, á bungu re, <<Nyhne, me nlokeltum ewa ma-a wuk. N fili elkpin ename egame abo fere lim ji a tong-m no re me n lim.

²² Anv titi, wuungu me nlokeltum ewa atung, me n ka-a nsol alehke eji a l'li kpe bel eko tahm eja kehng.<<

²³ Á ten, fere bung re, <<N nehm li.

<< Wo aneblum ebe tobo nnenkal, bo gboong-e, á w'wuungu bo atung. Á mehle go ndi fere ji go nlaabe eti.

²⁴ Nnenkal noo bele njokojoka mmon edah-magbudu o etahk, á soro wul-e tvtv. Á nyahke abe kahm lim ngbu nyi ki kpi ayist.

²⁵ Á kehm jehke Sol a aneblum ebe bo li. Atv manehm o bo soro mehl tahm.

29

Anebe Filista Tene Devid

¹ Anebe Filista kehm lungu nsoja ebo, bo song kono go Afek, nsoja nyi anebe Isreel kono go ekpabingi ji Jejireel.

² Ana atubesi ba anebe Filista jo jen go nlong atahl alon, a atahltahl atahltahl, Devid a aneblum ebe jo jene go njahm toono ntul Akisi.

³ Atubesi nsoja nyi anebe Filista bahbe re, <<Anebe Hibru baa mee? << Akisi faange re, <<Devid sang a ji jolo ntubesi abalimi eltum no Sol ntul no anebe Isreela? Yeb jol aname ebsehng elya, bomo efung bi atahme Sol sa tete rehng anv, n ka nyehn ebi ajehng ajehng go ege.

⁴ Wo atubesi nsoja nyi anebe Filista atahng rake bo tob Akisi, bo kehm bungu re, <<Tum nnenlum noa á feere song go edi ji a tib-e no. Á ki-r toono ba ebta, tohko jol ano á bahke fere senng'e kuum-r, ngare nyi ebta kp'noko. Jol ga nob re á feere song tob nde nju ewe, sehng'e re á wul aneblum ebahre kiimi bo asi.

⁵ Devid jia sang bo kpo yim ese elbahne ebo bada ne re:

<< 'Sol ebwul ane atahltahl atahltahl ebe, Devid ebwul ane atahlakuu a nkuua'?<<

⁶ Owo Akisi kehm lungu Devid tong-e re, <<Etingitingi ana Jehova li go elkpin, wob jol nne no bo kpa-a bumu go etingitingi, jol-m koro re wo jol jo lok-m go egama nsoja. Bomo efung bi a ba go egame tete rehng lela, n ka tiki nyehn ebi ajehng ajehng go ega, wo atubesi re bo wa-a ka liingi.

⁷ Anv, feere song go elkoono, ka lim ejum ajehng ajehng ji bahke sabe atubesi anebe Filista.

⁸ Devid kehm bahbe re, <<Wo anv, jenjii m ma lim? Ebi ajii a ma nyehn ji li bada nlokeltum ewa, bomo efung bi m ba a ega, tete tub anv? Jenji wahng'e n l'k'song nok a anebekv ba nso ntul ewame?

⁹ Akisi kehm faange re, <<N kp'kahne re wob jol jo lim ji jo nob egame amahr, ana enjel nyi Esowo; Eltim ki-a gbiingi eji ma jol ano, atubesi anebe Filista ebbung re, <Ye nehm toon-r je ebta.>

¹⁰ Mehl efungfu behre behre wo toono alokel-tum nde nju ewa, bo ji toon-a ba, wahn tahm, efungu behre behre ana edi kp'lennge na lennge.<<

11 Owo Devid a ane ebe, bo kehm tahme efungfu behre behre feere ndi nyi anebe Filista, anebe Filista wahr asongo go Jejireel.

30

Devid Rannge Anebe Amalek

¹ Devid a ane ebe feere ba rehng go Jiklag, efung bi biingi nfung era. Wo re bo kehm rehng o, anebe Amalek ebsong nok ebta go ejang eboblum nfam go elka emahng. Bo song noko a ejahbe Jiklag, fere jahm fi,

² bo bobo anebkal a nne awohng awohng no jolo o, abonse a anebkul. Bo wulem nne awohng awohng, wo bo kpu bo tahm abo eji bo jo feere kehng.

³ Eji Devid a ane ebe rehng go Jiklag, bo song nyehne re agun ebranng Jiklag, fvfo akal ebo, abon ba nlum, a ba nkal bo bobo bo song kak eju.

⁴ Owo Devid a ane ebe kehm lingi wahre wahre tete eko tan bo, bo kpeem ma jo ling.

⁵ Anebe Amalek fvfo tob bobo akal abal ba Devid, Ahinom ji nnea Jejireel, a Abigel ji nkalebun no Nabal ji nnea Kamel.

⁶ Devid jolo go egburu ntong, tibre bo jo bungu re, bo bahk-e tuubu atal, nne awohng awohng rak-e rehng nnahb eltim, tib esi abon ba nlum a ba nkal. Wo Devid bele atahne goji Jehova ji Esowo ebe.

⁷ Owo Devid kehm tongo Abiata ji nliman-jom mmon no Ahimelek re, <<Ko nkpehrekahbe ewobo ji nlimanjom ba ka-m. Abiata ko ba ka-e.

⁸ Devid kehm bahbe Jehova re, <<Any, me n kam toono ellong abar'ranng baa, m bahke ma

kpiri boa? Jehova faang-e re, <<Kam toono bo, a bahke lohko kpiri bo, fere mal, tahre bo.

⁹ Devid a ane atahltahl atahlawubu ebe, bo song rehng go edamme ji Beso, edi jio wo egom jehko sa go njahm.

¹⁰ Ane atahl awubu gbo ewo, bo maam siiri edamme, wo Devid a ane atahltahl bako, bo soro asi jo kam toono asongo.

¹¹ Bo kehm song nyehn nnea Ijib go ekulugbe ko-e ba a ne goji Devid. Bo ka-e alahb re á wo, fere tob ka-e nsol alehke re á li,

¹² bo tob ka-e ebahk abane abane ngbu, nya bo ko afik lim, a abane bane ngbu abal nya bo ko agreb lim. Á li, fere bel eko, tib á ka tiki li nsol, afi wo alahb, go nfung na era, a atv era.

¹³ Devid bahb-e re, á li ka nne awoo? Gan wo a lohng no? /

Á kehm bungu re, <<Me nnea Ijib wo, n li nju nyi nne Amalek. Nsoo ewame nju ma-m tahnge tub eji n jo yam, lela nfung era nyi a.

¹⁴ E ba noko a ejang eboblum emahng ji li ka anebe et'tohngo Kered, edi ji li ka Juda, a ejang ji li ka ane ba et'tohngo ji eboblum emahng bi li ka et'tohngo ji Keleb. E fere jahm Jiklag fi.

¹⁵ Devid kehm-e bahbe re, <<A bahk-m ma tv song rehng edi ji ellong nsoja nyi ba ranng ejahbe li noa?" ane ba, ba rannga?

Á faange re, <<Tir tong-m go esamahr Esowo re me-e a nehm wul afii yak-m ka nsoo ewame nju, m bahk-a koko tahm goji bo."

¹⁶ Á tv Devid bo rehng go, ane bao ebyaame kpee yel akpohko ejahbe, kp'lehke fere kp'woko

jo bahn, tib go agbojok nsol nyi bo ma da go ndi nyi anebe Filista a Juda.

¹⁷ Devid noko a bo, bomo elgung ni efung bio, tete elgung ni efung behko, nnene beem lohng, sehngem njangkun atahltahl bo ji kuumu akamel bo ba be for.

¹⁸ Devid koo ejum ajehng ajehng ji anebe Amalek rodo no tahm a ji, budu akal ebe na abal.

¹⁹ Ejumjum tanem, ajangkun afii anebkul, abon ba nlum afii abon ba nkal, nsol nyi bo da no afii ejum ajehng ajehng ji bo rodo no tahm a ji. Devid koo ejum ajehng ajehng feere aji.

²⁰ Á kpuu ellong ejoro a ellong adamagbudu, ane ebe gbo mbang jo jen abo asongo, go mbuk-song nyi atohkondi nyako jo bung re, <<A wo li nsol nyi Devid ma da go ebta."

²¹ Owo Devid bo kehm bake ba kpiri aneblum atahl awubu ba gbo ewo, bo ki-e ma kpe toono, bo sa go njahm edamme ji Beso. Bo kehm lohngo ba re bo ba wane Devid a ane ba jolo a ne. Ana Devid a ane ebe kp'rehnge o, á bahbe bo ana bo li no.

²² Wo abi ane kpee, kehm bake ba kpiri a abasebe afem go ellong ane ba toono Devid kehme elbungu re, <<Tib eji bo ki-r toono je, e nehm bak bo nsol nyi e song da kehng a nyi. Limi limi kan, nnenlum awohng awohng bahke ma ko nkal ewe a abon ebe, bo song.

²³ Devid faange re, <<E'ee, abonanee ba nlum, kana lim ano go ejum ji Jehova ma-r kaa, á ma-r kuuru yehke, fere yake ellong ane ni ba nok anahre kak egahre abo.

²⁴ Nne awoo bahke wuungu atung go ejum ji wahn kp'bungu? M bake nyi nnenlum no sa jo kpur nsol, a nnenlum no je ebta, bahke jolo jangjang. Ane kpee bahke baange jangjang.<<

²⁵ Devid bumu limi jia jol ntahm a eljini ka anebe Isreel bomo efung bio tete tub anv.

²⁶ Eji Devid rehng go Jiklag, a tumu nsol nyindiki nyi á da no tv anebkul Juda, bo ji jolo ate ebe, á bungu re, <<A wo li ayare nya lohng go nsol nyi n da goji anebekv ba Jehova."

²⁷ Devid tumu tv bo ji jolo go Betel, bo ji jolo Ramoti go ejang emahng eboblum nfam, a Jati.

²⁸ tob tum tv bo ji li Aroe Sifmoti, Estemoa,

²⁹ a Rakal; tv bo ji jolo ajahbe nya anebe Jerameel a anebe Ken;

³⁰ tv bo ji Homa, Bor Asan, Adak,

³¹ a Hebron, tob tum tv bo ji jolo adi nyako kpee nya ye a ane ebe jo beeme yanng.

31

Elkv ni Sol a abon ebe.

¹ Anebe Filista jo noko a anebe Isreel, anebe Isreel be, egom gbalee bo wulu bo go egburu ewong Gilboa.

² Anebe Filista jo sahb k'kam Sol a abon ebe, fvfo bo wulu abon ebe ba nlum, Jonatan, Abinadab a Malki-Sua.

³ Ebta fubu toono Sol senng-e kak, ana bo ta elban song bob-e, bo lim-e ejum alung ji sahb gb'gbal.

⁴ Sol kehm tongo nne no jo fili nsol ebta enye re, <<Tohng ekahngkahng eba yehke wo jahm-m wul, tohko jol ano anebe Filista baa ba kil jo yehke nrur bahke bake ba wul-m, fere jo suum. Wo nne no jo fili nsol ebta enye menng-e sehng re á lim ano, owo Sol kehm rod ekahngkahng ebe jahm ekpare eje go ndi gbo jahme.

⁵ Eji nfila nsol ebta enye nyehne re Sol ebkpo, ye fvfo tob rodo ekahngkahng ebe jahm ekpare go ndi gbo jahme, tob kpo a ne.

⁶ Go mbang ny'nehm nyi, Sol a abon ebe na ara, go nne no jo fili nsol ebta enye, a aneblum ebe kpee kpo efung b'nehm.

⁷ Eji anebe Isreel ba jolo go edamme a bo ji lene go egbuk aya Jodan jehko nyehne re, nsoja nyi anebe Isreel ebbe, gana Sol a abon ebe ebkpo, bo be tahm ajahbe ebo sa, anebe Filista lohng ba ko ajahbe nyao.

⁸ Njahm efungfu eji anebe Filista lohngo no song kehme akvne feede, re bo yehke nsol go abam akpakv nsoja, bo nyehne Sol a abon ebe na ara ma kpo go egburu ewong ji Gilboa.

⁹ Bo kim-e esi fere yehke nsol ebta, bo tumu atiingi etib tv go ndi nyi anebe Filista re, bo tiingi etib bio go etahk alokelom ebo, tob tiingi ane ebo.

¹⁰ Bo rodo nsol ebta enye kak go etahk elom ji asowo ebo ji bo kpo lung re Astoreti fere kum ngubjing enye lake go ekahme ji Beti San.

¹¹ Eji anebe Jabesi Giled wuku ji anebe Filista ma lim Sol,

¹² atahntahn ane ebo kpee jene atv atv rehng Beti San. Bo song fono ngubjing nyi Sol a nya

abon ebe go ekahme ji Beti San, Sol a abon ebe,
feere go Jabesi, bo ba jahm bo fi.

¹³ Owo bo kehm rodo akahb ebo song kpa kak
go nla eti ji bo kpo lung re tamarisi go Jabesi, bo
fere bade elbo njal nfung esehma.

Ekajuk Scriptures Bible Portions

Ekajuk: Ekajuk Scriptures Bible Portions (Bible)

copyright © 2024 Luke Initiative for Scripture Translation and The Seed Company

Language: Ekajuk

Contributor: Luke Initiative for Scripture Translation

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-02

PDF generated using Haiola and XeLaTeX on 1 Jul 2025 from source files dated 2 Jul 2025

fac6af8a-bed4-59a3-a152-52e0061121a4